

# الفارس الذهبي

مسرحيات بالعامية



المنشور من قبل المجلس الثقافي البريطاني

5679

مولانا....

مسرحيتان بالعامية

مسرحيتان بالعامية: مولانا  
ليلى والذئب

تأليف: الفارس الذهبي  
لوحة الغلاف: يوسف عبدلكي  
تصميم الغلاف: صفاء الست  
الإخراج: محمد غيث الحاج حسين

الطبعة الأولى: تموز /2008م / جميع الحقوق محفوظة لدار ممدوح عدوان للنشر والتوزيع

التوزيع في سورية:

دار ممدوح عدوان للنشر والتوزيع

دمشق - ص ب: /9838/

هاتف / فاكس: /6133856/ 11 00963

جوال: /266681/ 94 00963

البريد الإلكتروني: [ADDAR@mamdouhadwan.net](mailto:ADDAR@mamdouhadwan.net)



تم إنتاج هذا العمل (مولانا) بمنحة من المورد الثقافي

**This production (mawlana) was made possible through culture resource's production awards programme.**

**Cette production (...mawlana.. ) est réalisée grâce à un des Prix de Production des Jeunes Artistes de la Ressource Culturelle**



**Culture Resource**



الى من علمنا الفزادة،

خيري الذهبي...





## المحتوى

11	مقدمة نصر حامد أبو زيد
19	مسرحية مولانا
59	مقدمة حكيم مرزوقي
65	ليلى والذئب



# المولى "عابد" والبحت عن أوركسترا الكون

تقديم: نصر حامد أبو زيد

ترددت كثيرا في كتابة هذه المقدمة رغم إعجابي الشديد بالمرحلية حين قرأتها أول مرة. ترددت - أولا - لأن الكتابة المسرحية أو النصوص الدرامية ليست مجال اختصاصي، رغم أنني اعتبر نفسي متذوقا لكل أنماط النصوص الأدبية ولكل أنواع الفنون، مجرد متذوق ولست متخصصا ولا ناقدا. وترددت - ثانيا - لأنني إزاء نص ولست إزاء عرض. وفي حدود معلوماتي المتواضعة، النص في المسرح مثل النوتة الموسيقية التي كتبها المؤلف الموسيقي. وكما تحتاج النوتة الموسيقية إلى مايسترو يقرأها ويوزعها على آلات العازفين، ويقود الأوركسترا، لكي يصبح النص المكتوب في النوتة موسيقى، كذلك يحتاج النص المسرحي إلى ممثلين وديكور ومخرج وإضاءة حتى يتحول إلى عرض مسرحي. ماذا

أفعل وقد طُلب مني أن أكتب مقدمة لهذه المسرحية، طلبٌ عزيزٌ من شخصٍ عزيزٍ لا أتحمّل أن أرد له طلباً؟

قرأت المسرحية عدة مرات فازداد إعجابي بها جداً، وساعدني المؤلف الذهبي كثيراً بإشاراته وتوجيهاته فجعلني أحوّل في مخيلتي النص إلى عرض، أعترف بأنني استمتعت به كثيراً.

ولا شك أن المؤلف أدرك بحسه المرفه الرائع وقراءته الدقيقة للموضوع أن علاقتي بمولانا ستساعدني على فك شفرة توجيهاته وإشاراته، وأرجو أن أكون نجحت. بل وأرجو للمخرج والممثلين وصانعي الديكور والموسيقى أن يجيدوا قراءة هذا النص الذي لا أتردد الآن في القول إنه مذهل.

الفضاء، فضاء العرض، هو سفح جبل "قاسيون" حيث مرقد ابن عربي في دمشق بمآذنها وقبابها وباختلاط أصوات المؤذن بأصوات المنشدين، بأصوات الأغاني الصادرة عن المذيع، بأصوات الباعة والمنادين على السلع في السوق. وهي أصوات لا تقدم خلفية للمشاهد، بل هي جزء من العرض، ينجح المؤلف في توظيفها كجوقة بحسب المقام والحال (حال البطل ومقامه). اختلاط الأصوات هذا وتعددتها واختلاف طبقاتها وتنغماتها ماذا يعني؟ أوركسترا الموسيقى الكونية؟ ربما.

البطل الوحيد في العرض درويش شاب "عابد" في ثياب المولوية، وهو ابن خادم مسجد مولانا محيي الدين بن عربي. الأب رجل صالح ينتمي إلى هؤلاء المؤمنين الطيبين الذين يفزعهم كلام المتصوفة وشطحاتهم؛ لأنهم أقرب إلى الأمان في عبادة الدين المعيارى، دين الحلال والحرام، دين المكروه والمباح. هؤلاء المؤمنون الذين يعشقون الاحتماء بالجماعة، ولا يحبون الفرد الذي يخرج عن السرب: التغريد خارج السرب نشاز. لكنهم في نفس الوقت لا يكرهون المتصوفة، بل يحبونهم ويجلونهم وإن

كانوا لا يوافقون على اختياراتهم. هذا هو بعد الصراع الأول في النص حيث الإبن أشبه بروح تبحث عن اكتمالها وعن صفاتها. يريد أن يلتحق الشاب بفرقة المولوية ليتعلم طقوس الذكر التي يقودها الشيخ "عبد القدوس". الأب يؤرقه أكثر ما إذا كان ولده قد حفظ الألفية - ألفية ابن مالك في النحو - متفوقا على أقرانه. التفوق على الأقران هو معيار التفوق عند الأب.

يتجلى بعد ذلك الصراع الثاني بين الفتى البطل والشيخ عبد القدوس بعد أن يوافق أبوه على مضمض أن يلتحق بالجماعة الصوفية ليتعلم فنون الطريقة والحضرة. الشيخ عبد القدوس شيخ طريقة، التصوف بالنسبة له هو "الطاعة" المطلقة من جانب المرید للشيخ، ووجود أن يظل المرید في الحضرة يتحرك وينشد مع إيقاع المجموعة. تصوف الطريقة هذا لا يناسب روح الفتى المثوبة لما هو أعلى وأعمق، للرقص مع أنغام الكون وللاتحاد بالمطلق في صفاته وجماله وجلاله. يريد "عابد" أن يندمج في أوركسترا الموسيقى الكونية، التي تعكسها موسيقى تداخل الأصوات حول قبر محيي الدين.

من أين أتى للشباب هذا الطموح الذي يتجاوز كل الأعراف الدينية، بما فيها أعراف الطريقة وقوانينها؟ إنه "الحب"، إنه الوقوع في أسر الجمال الإنساني للمرأة بسحر النظر وحده، النظر المختلس الذي يوقع الشاب في فزع أنه قد ارتكب رذيلة التلصص على الجيران. الجيران بنات أوروبيات يستمعن إلى موسيقى غربية من راديو استطاع أن يسمعه. وقع الفتى في الحب فاستأنس به الطير ولم يخشيه كما كان يفعل من قبل. إن "الحب" بداية التصالح مع الكون. هكذا يمر الفتى بتجربة الحب فترفعه. يلتقي "عابد" بالشيخ الأكبر في "رؤيا" فتفتح له الآفاق المجهولة من التجربة الصوفية. يطمئنه الشيخ أن الحب هو أصل الوجود، وهو اللحمة التي تربط أعضاء الكون.

المسرحية تجوب في آفاق متعددة من الحياة: الحب، الفقر، السعادة، الرضا، الأحلام والرؤى لتوحي برسائل وليس برسالة واحدة. من المستحيل الإمام بكل الغنى والروعة والثراء الذي يتضمنه هذا النص الصغير في مقدمة مثل هذه. كم أتمنى أن يتاح لهذا النص المحكم ما يليق به من عرض، وكم أتمنى أن أكون أول المشاهدين.

## مقدمة لا بد منها

مسرحية مولانا، والتي صنفتها ضمن فن المونودراما، تستقي بالخلفية الأساسية لها من أصول وبدايات المسرح المعروف في اليونان حينما كان الممثل يقوم بأداء دوره التمثيلي وحيداً ثم أضاف عليه ثسبس الممثل الثاني والجوقة.

ومن هنا انطلقت في بحثي مع الدرويش عابد الذي يؤدي دوره وحيداً على الخشبة ولكن بمرافقة جوقة افتراضية ممسرحة مسرحية كاملة وأداؤها مؤسلب بشكل كامل لتشكل كسراً للمتلقي في حل إيهامه ولتذكره بصراع الفرد مع المنظومة المحيطة به مهما كانت وأينما كانت... الجوقة في هذا العمل هي المجتمع القاسي هي صوت الآخرين عندما يضرب الداخل، هي صوت الضمير البشري والوعي عندما يتكلم، وهي صوت اللاوعي عندما يتحرك.

إن صراع الممثل مع الجوقة أو الإنسان مع المجتمع هو الفعل والحراك الرئيسي في كل من الحياة والواقع من جهة والمسرح والخشبة من جهة أخرى وهذا النص بالتالي هو العودة الى الأصول من كلا الطرفين.

في هذا النص يكون الصراع الداخلي هو المحرك لحياة هذا الشاب الذي يتمتع بفرديانية عالية تجعله يرفض الانخراط في المجموعة ويصر على أن يبقى صوتاً متفرداً وهو ما يدفعه الى السقوط والانحدار من مجتمعه. وهذا ما يجعله يفهم التصوف بفرديية وعلى طريقته الخاصة مع الاحتفاظ بقداسة المقدسات .

هو صوت متفرد وعال ولكن وحيد وهذا ما يجعل آلة المجتمع تسحقه.

إن أداء البطل هو أداء إيهامي كامل بعكس الجوقة المؤسلبية كما ذكرت، وهذا ما سيخلق إسقاطاً للأداء بين الفرد والمجموعة ومحاكاة شكلية لمضمون العمل .

أقترح لهذا العمل أن تؤدي الجوقة الأدوار الأخرى كلها فتكون الأصوات الأخرى التي تدخل على البطل... وهذا مما يساعد على تعزيز الفكرة. هذا العمل مهدي الى خاتم الولاية الشيخ الأكبر محي الدين بن عربي الذي يكمن السر في رسالته في تفسير المساحة بين الأنا والوجود. (الذات والموضوع) من خلال تجربته الصوفية التي كانت رسالة محبة راقية وشفافة لبني البشر أن أحبوا بعضكم فتصلوا لمحبة الله عز وجل، ولأنه قد استقر في فهمه أن إدراك الوجود خارج الأنا جهل وحيرة، وأن مقاربيته بوساطة العقل وباستخدام التفكير المنطقي لا يمكن أن ينتج سوى دوران في خواء وضياع. ثم إن محاولة الدوران الفاشلة لدى البطل عابد بين ما هو إلهي وما هو إنساني - في فهمه - لم تكن إلا محاولة لإقصاء الإنسان عن نفسه ذاتها. وفي هذا السياق أشير إلى أن العلاقة بين الأنا والوجود هي علاقة معرفية بالدرجة الأولى.

ان الصراع الذي يعيشه البطل عابد ضد مجتمعه الذي يؤمن بالحلول الجمعية لكل تفاصيل المجتمع والقامع تقريبا لكل التجارب الفردية...



هو بشكل أو بآخر الصراع ذاته الذي عاشه الشيخ محي الدين بن عربي  
بفرديته العالية ضد المجتمع المتدين المتطرف، والذي رفض بكل الوسائل  
مفهوم تواصل العبد مع المعبود دون واسطة أو وسيط... ذلك المجتمع الذي  
رفض حب الفرد للذات الإلهية عبر المفهوم الشخصي للذات الإلهية .  
هذا النص مهدي لروح الشيخ الأكبر محي الدين بن عربي لما يمثله  
من طريقة تفكير وسلوك أثرت بالكثير وساهمت بتكريس فلسفة  
الحب.

الفارس الذهبي

2007\9\4

دمشق



سطح أحد المنازل الدمشقية العربية في سفوح جبل  
قاسيون وتحديداً في حي الشيخ محي الدين.  
في العمق تبدو عشرات المآذن، على الطراز المملوكي  
والأيوبي... أصوات بعيدة من الأذان والأناشيد...  
أسراب الحمام الأبيض ترف في السماء...  
يصعد شاب من الدرج الى سطح المنزل... الشاب يلبس  
لباس الدراويش المولوية... يتلفت يمناً وشمالاً... يحاول  
النظر من فوق أحد الجدران نحو بيت الجيران... يعود  
ليجلس مستنداً على خزان المياه الحديدي ليقول بهدوء:  
آخ يا شيخ محدين...  
آخ يا شيخخي...  
آخ لو تعرف...  
ثم ينهض...  
نحو الجمهور...

الشيخ محدين وما أدراكم ما الشيخ محدين.... أحلى  
حارة بكل الشام... وأكثر شارع لساتو شامي....  
لساتو أصلي... مع أنو برات السور...

الشيخ محدين كعبة البسطاء، وخيمة المحروم، الشيخ  
محدين عباية البردان وغطا المستورين، آخ يا شيخي لو أنك  
بتسمع هلق الملتك شو عم يصير معي وشو صار بهالدنيا  
آخ يا شيخنا، أنك معنا، شو كانت فرقت معنا !!.

بياعين الخضرة واللحمة، والفواكي، والحلو،  
والسمك، والعجوة، والناس، والنسوان، والولد... إيه...  
سوق طويل وحياء طويل، لا والله قصيرة ما بعرف !!.

(أصوات الجوقة يؤدون أدوارهم بأسلحة كاملة  
وهم يصرخون على الفواكه والخضرة واللحوم والدخان:  
يرجى مراعاة الأناشيد الأصلية لكل مادة من المواد،  
تستمر الجوقة في هذا الأداء لحين انتهاء مشهد السوق)

الجوامع والمدارس والزوايا المتصوفة، شيء مملوكي،  
وشيء أيوبي، وشيء أموي، والشيخ محدين... قاعد  
بالنص مثل الملك، والكل محاوطينوا ولافين حواليه  
مثل التلاميذ بحضرة شيخهن... والناس... آخ من الناس .

بلشت القصة معي من هنيك من بين الناس، من حارة  
الشيخ محي الدين... هنيك كنت ساكن... مع أهلي محي.  
وأمي... كانت بالليل تعمللنا وقت نرجع أطلب  
أكلة...، أكلة الأكلات...، البيض المقلي مع

القاورما...!!

والقاورما للي ما بيعرف: هيه اللحمة المفرومة، لحمة العجل المفرومة والمقلاية مع البصل والملح والفلفل... آخ شو طيبة القاورما... كنت دائماً أسرق شوي وحطلمن حد، واهرب من عيون الناس وأكلهن على جنب، أي شي على جنب كنت حسه طيب... هيك... لا تسألوني ليش... بعرف أنو هادا الشي أنانية بس أنا من يوم يومي كنت حب كون لحالي واعمل أشيائي لحالي ما بعرف ليش!! كنت روح على جنب المدرسة الشركسية أو ورا شي تربة أو مزار أو مدفن: الأتابكية أو الصاحبية أو تربة شي ولي مجهول واقعد لحالي أتأمل بالقاورما... هنيك بحارة الشيخ محدين اللي هي مخلوطة خلط مثل القاورما، بس بدل الملح تجارة وبدل الفلفل تصوف، حارة مالها مثيل بالعالم... بتكون واقف بره عم تشتري من شي واحد شغلة أو غرض.. وأنت بتعرف أنه هيه أحسن شي بالسوق وبتعرف أنو البياع عم يسرقك وينصب عليك وأنت موافق، لأنو بضاعته ممتازة، وأحسن شي بالبلد وهو عنده هالثقة اللي بتخليه ما يتنازل بالسعر لأنو بيعرف أنك زبون نوعية... ومشان هيك جاية عالشيخ... بعدين بتخلص شري وبتفوت عالجامع (جامع الشيخ محدين) لتصلي ركعتين أو لتقرا الفاتحة على تربته الطاهرة الله يرحمها ويقدم سره (الفاتحة) (الجوقة بجميع عناصرها يقومون بقراءة الفاتحة بخشوع).

قام بتشوف نفس الزلة اللي سرقتك برضاك بره قبل شوي... بتشوفوا ساجد وقاعد عم يدعي والدموع عم

تشر من عيونو شر بكل صدق وإخلاص وتعبد  
وزهد، وهو قاعد بين ايدين ربه وعم يناجيه  
ويشتكيله... غريب!!... غريب!!

يا أخي هالقاورما شلون معمولة؟... بس طيبة وحلوة  
وظريفة ومنيحة بأيام الغلا...  
قاورما... قاورما ، ، قاورما<sup>1</sup>.

الجوقة

كنا نقعد على الأرض ببييتنا بالشيخ محي الدين كلنا...  
أنا وأبي وأمي وأخواتي... أبي كان مسؤول تكية الشيخ  
محين... كان هو اللي ينيم العالم كل واحد بمكانه  
ويفتح الباب ويسكروا... المفتاح كان معه!... أبي  
الحجي زين العابدين كان هو المسؤول عن جمع  
التبرعات اللي بتجي وتوزعها على الفقرا، كل فجر يوم  
اتنين... أبي الحجي زين العابدين اللي كان الشيخ  
محين كله يوقف على حيله وقت يمر... الحاج زين  
العابدين بدقنوا البيض المهيبة وجلابيتو اللي مثل الثلج  
ومسبحته الطويلة اللي عم بترن بايدوا رن... ونحنا بالبيت  
كنا نخاف منو أكثر من كل العالم، لأنو كان  
ماسكها حبلية معنا... ، يعني ومزودها شوي: ...  
الموسيقى... ممنوع... والتلفزيون... ممنوع... روحات  
وجيات... ممنوع... كل شي الله خلقنا من شأنه هو العلم  
والعبادة وخدمة الناس...

<sup>1</sup> القاورما: تسمية تركية لطعام من بلاد الشام، وهي عبارة عن اللحم المفروم المقلي مع دهنه ويحفظ في علب كي يأكل في أيام الشتاء القاسية

كان يوقف قدام الحلة وبايدوا الكبجاية مثل الراعي  
اللي حامل عصاه، وعم يسكب لهاالعالم الفقرا على  
باب الله واللي واقفين بالطوابير لآخر السوق كل واحد  
حسب الطنجرة اللي جايها... يوم فاصوليا عيشة خانم  
ويوم شوربة عدس ويوم رز بفول.

ولبعد صلاة الفجر... بتشوف هالعالم: يلي حامل طنجرة  
ويلي حامل زبدية وهادا طاسة، والحجي بايدو... عم  
يصب اللي جادوا فيه أهل الخير شي بلحمة وشي بلا  
لحمة، شي رباطات خبز وشي كياس حنطة. وهلق شوي  
بتذكرهم أنا: أبو طه الميداني كان ما يقطع اتنين،  
وأبو مستو التحتاني كمان، والحجة أنطوانيت مثل ما  
كنا نقلها كانت الله يرحمها تحب الخضرة كثير...  
قال بتمشيلها معدتها بس الله يذكرها بالخير كانت  
كل ما تعبي زبديتها النحاس توقف وتقول الله يرحمك  
يا شيخنا... وأنا اندهش وأسألوا لأبي: ليش؟ مو هيه  
مسيحية؟ ويقلي: "قدس الله سره" ويسكت. إيه، وأبو  
بسام الأعمى كمان كان يقاسم الحمامات بخبزاتو  
دائماً ويوقف بصوتوا العالي ويرفع عكازتو ويصرخ:  
الله يديمك يا حجي الله يديمك.

الجوقة : (الله يديمك يا حجي، الله يخليك ولادك، الله يعز من  
مقداركن، الله يوجهلكن اللي فيه الخير كيف ما  
وليتوا وشكن).

كانت تكية الشيخ محدين مركز للتبرعات على  
مستوى، وبتشوف نسوان هالأكابر بيحوا بالمرسيدسات

والسيارات السود الكبار ويبركض الحجي لعندهن،  
 وبعدين بينزل الشوفير ويفتح الطبون ويتنزل  
 الخيرات...ومو عن شفقة وفضلة لألا أنا بتذكر كان  
 في وحدة الله يرحمها تجي دوم، وتنزل التبرعات اللي  
 كانت جامعتن من رفقاتها ومنها! والله نسيت شو  
 اسمها... كان الحجي ينزل الغراض وهيه تحط على  
 راسها وتقوت عم ترجف ع الجامع... لحالها... وتطلع  
 بعد شي نص ساعة وعيونها معبايين دمع وكأنها  
 بكيانة... مرة تخبيت بالجامع قلت بدي شوف شو عم  
 يصير معها، وكنت عرفان أنو هادا يومها وشفتها.  
 كانت عم تحكي مع القبر...يا لطيف أطف.

الجوقة : (يا لطيف أطف... يا نجى الألفاف نجنا مما نخاف)...

ولك ايه كانت عم تحكي مع الشيخ وتعاتبو وترفع  
 ايديها للسما وتعيط وبعدين تقعد، وترجع تحاكيه  
 وتقوله: أنت قلت هيك وبعدين تقعد، وقتها ما فهمت  
 منها شي... بس اللي حسيتو اني خفت وما راحت من  
 بالي أبدا هي القصة.

وكنت ساعد الحجي دوم أنا... وهيك صرنا مشهورين  
 أنا والحجي لأنو هنه بيسموه أبو عابد... على اسمي أنا...  
 عابد... بس يا حسرة شهرتنا... ما طبقت الآفاق ولا شي  
 مثل ما كنت مفكر... ولا جابتلنا شي إلا الدعاوي  
 والحسنات لأنو نحنا صرنا مشهورين بأحياء العشوائيات  
 والمخالفات والفقرا والمعدومين ويلي بلا بيوت أو سقف  
 يحويهن... أيه مو مشكلة كلو شهرة...



ايه في مرة من المرات كنت واقف عم هدي طنجرة الفاصوليا ، وكان أبي عم يسكب للعالم والدنيا كانت برد وهوا والسما محبسة ما عم ينزل مطر يعني برد مثل السم... والدور كان طويل وتعبان ، مثل الواقفين كأنهن طالعين عالسما ومالن عرفانين ليش... وأنا عم بصفن ، كان الدور عم بيقل ويقصر لحد ما قال الحجى: مثل العادة الجوع أكبر من الطعام.

واتطلعت عالحلة... كانت فاضية وأبي عم يقشط الفاصوليات البقيانين... اتطلعت لقدامي لقيتلك واحد ختيار واقف وحامل طاسة بلاستيك وايديه عم ترجف... صار يقول: الله يديمك يا حجى... الله يخليك ياه... أبي اتطلع فيني وقال... لا اله إلا الله... ودار وشو وفات لجوا... الختيار ضل عم يطلع فيني وهوه ساكت وايديه عم ترجف... اتطلعت فيه بدون ما احكي نزلت دمعة من عيني... وحملت حالي وركدت وركدت حتى وصلت عالبيت ، فتت فوراً عالطبخ فتحت البراد... كانت أمي شايلة لأبي صحن كباب هندي وصحن سلطة مشان وقت يرجع يتعشاهن... حملت الصحنين وسكبتهن بالسفرطاس ورجعت ركد بالنزول... كنت عرفان أني مارح لاقيه للختيار... وما لقيتو... دورت عليه ليكون متخبي بشي باب من بواب المدارس أو باب شي ترية... ومدرسة مدرسة فتشتهن لحد ما شفتوا... كان قاعد وقدامو كيس أبيض وعم يلاعب قطة بالخيطان... قربت منو وقلتلو شرف حجى هدول من أبو عابد...

أخذ الأكل وبلش يدعيلى أنا والوالد ، وشال قطعة كباب ورمها للقطعة... فصارت تبكي هي .وأنا وقفت وصرت أبكي كمان على صوت دعوات الختبار..  
 قام قلى: شيخنا علمنا "وأشر على جامع الشيخ محي الدين " انو الكائنات كلها أخواتنا وكلها عندها أرواح بتزعل وبترضى وبتجوع .وكمل دعاؤه...  
 بس يبدو أنوا دعوات الفقرا حيلها مقطوع من التعب والتعير والجوع وما بتوصل للسما...

الجوقة : (تردد بشكل مسرحي مؤسلب دعوى الفقراء ، حيث تقسم الجوقة الى قسمين قرار وجواب). (يا الله يا الله يا الله يا رب يا نافع يا رحمن يا رحيم أسألك بحرمة هذه الأسماء والآيات والكلمات... سلطاناً نصيراً ورزقاً كثيراً وقلباً قريراً).

إيه سيدي لا الفارة طاهرة ولا دعاويها مستجابة... ومثل ما كان هداك الرسام اللي ساكن بحارتنا كاتب بمرسمه... على لوحة معلقة على الحيط (الله لا يحب الفقراء).

الجوقة : أستغفر الله العظيم..... أستغفر الله العظيم .

إيه

الشيخ محدين وما أدراك ما الشيخ محدين.... .  
 وقت نزلت لأول مرة بحياتي عالسوق تبع الشيخ محدين ، كان عمري شي 10 سنين ، أخذني وقتها أبو

عابد معو لزيارة الشيخ عبادة، وبعدين قللي بنروح  
نصلي العشا سوى قدام قبر الشيخ محدين ومنرجع  
عالبيت فوراً.

أبي الحجى كان مو كثير يحب الشيخ محدين بس كان  
يحترموا كثير ويقدره ويقراله الفاتحة دائماً، وبعدين  
يدعيه بالهداية والرحمة... ما بعرف ليش... بس مع هيك  
كان جامعوا هو أحب جامع على قلبه وأقرين عليه..  
فكان ياخذني ونروح

وأنا ماشي ورايح لهونيك ومشحوط ورا أبي اللي جاررني  
وراه، كنت ما عم أقدر شيل عيني عن الناس وعن  
البضائع والسّمك اللي فاتح تمو وقاعد فوق بعضو  
وكلو تلج... وشي عن راس خاروف مفتوح هيك وبتمو  
جرزة بقدوننس أو رقبة جمل وبتمو خسة... ما كنت  
أعرف ليش بتمو دائماً في حشيش... وعاليمين أهرامات  
معمولة من البندورة الحمراء أو البتنجان الأسود أو  
التفاح... والذي منو.

النسوان المطخية مشان تنقي ملابس داخلية رجالية... أو  
ولادية... والأرض مفروشة ورق خس وطنين... بسطات  
الكتب والصور والآيات المبروطة... وبياع التهريب اللي  
قاعد بتم المدرسة الجركسية ومخبي بضاعتو جوا  
بخزانة الصرامي...

ايه ونحن ماشيين بين الحارات كنا هونيك عم نسمع  
الحضرات والتدكير وهون فرقة عم تتدرب على أغاني  
مولد النبي:

(الجوقة تتقسم قسمين... قسم يغني طلع البدر علينا... من  
ثيات الوداع...)

الجوقة 2 : عليه الصلاة والسلام  
عليه الصلاة والسلام... صلى الله على محمد صلى الله  
عليه وسلم )

كنت أسمع المنشدين كل عشرة مع بعض، عم يأذنوا  
أو يدكروا وكنت أتدايق كثير... لأنو أنا بعرف أنو  
صبح ابن أبو صبح معهن وصوتو والله يجيرنا! من أنكر  
الأصوات... بس بيمرق بالعجقة... وأنا أكره شي علي  
العجقة اللي بتضيع كل شي وكل طعمة، لأنو أنا روح  
قلبي أسمع مادن واحد عم يجود لحالوا ويفرّد ويتلوى  
على طرب صوتوا . فكنت أمشي وغني لحالي... أو أدن  
لوحدي وأنا مسلطن على صوتي.... منشان بعد صورة  
صبح عني قد ما بقدر.

عابد : (يؤذن قليلاً) الله أكبر الله أكبر... أشهد أن لا إله إلا الله.  
ما كنت حب الأصوات اللي بتتخبا ورا بعضها، كنت  
أكره الجوقة... وياما بالحمام كانوا يدقو علي الباب  
وأنا عم غني النبويات أو القلب يعشق كل جميل... ايه  
هدا حال الدنيا... يا ريتها كلها حمام بس بمي، لأنو  
هيه حمام مقطوعة ميتو..

رحنا على بيت الشيخ عبادة وشربنا شاي وأكلنا عجوة  
وبرازق، وبعدين قرب الشيخ عبادة على أبي وقللوا بدي  
قلك قصة سرية وخاصة: قلله أبي: تفضل، عليك الأمان  
فسرك في بئر: قام أخذ الشيخ عبادة نفس وقال: أنا

بعرف أنو افشاء الرؤية يفسدها بس والله يا أبو عبادة  
روحي ما عادت طاقت السر ولا احتمالو، هز الوالد  
راسو بسخرية وأشربو بايدو انو كمل... فكمل الشيخ  
عبادة وقال: مبارح بالمنام زارني رجال شيخ لونو أبيض  
طالع النور منو، دقنوا بيضا وبسمتوا منورة والنور طالع  
من وجهه، فحسيت بالأمان قتلته مين انت قال: انا  
ملاك... حارس الحي، وأنت يا ابني الله باركك  
وباركك.

وبعد هالكلمة راح الملاك وفقت أنا من النوم فشو رأيك  
يا أبو عابد:

قام قلو أبي: أصلحك الله يا عبادة، فكل هذه  
التوهمات مرجعها التصوف الذي ما انفكيت عنه دارساً  
ومجرباً! واقسم لك بأن ما تفعله حرام فالله سبحانه  
تعالى أمرنا بالعبادات والأركان على سنة الله ورسوله  
وكفى المؤمنين شر التأويل، فاذهب الى ما ينفعك وينفع  
عباد الله على أن تبعد عن الأوهام والمشاهدات...

وكمل ابي الحديث وهو عم يخانق الشيخ عبادة... ابي  
كان ماسكها حنبلية شوي يعني ما بيحكي غير  
بالفصحى وما بيرضى غير باللي أمرنا فيه الرسول  
المصطفى وكان بينوا وبين حالو ينتقد الشيخ محي  
الدين ويدعيه بالهداية والغفران كل ما مرق جنب  
جامعو... أما أنا فحكي الشيخ عبادة فات على جسمي  
مثل الكهريا... هزني هز ما بعرف ليش، طلعت على  
اسطوح بيت الشيخ وبلشت اتطلع عالسوق: ناس مثل

النمل رايحة جاية طين ورجلين وتياب بيضا منشورة على  
حبال الغسيل وناس عم يسجدوا بالجامع... وصراخ  
وعياط وناس عم تتقاتل شي عالديني وشي عالآخرة...  
رفعت راسي واتطلعت عالسما وتمنيت لو كان عندي  
أجنحة لكنت طرت وبعدت عن كل هالعجقة ورفرفت  
لحالي وضليت طير لأوصل لأقرب نقطة بتوصلني لعند  
الله جل جلاله لقله: أنا بحبك ، بحبك لأنك خلقتني  
هيك وخليتني أنا والوالد نساعد هالناس بدل ما نحتاج  
حدا يساعدنا... وصرخت: أنا بحبك... حتى صار السوق  
كلوا يتطلع عليي...

(يتغير المشهد وتصبح المآذن أعلى وتظهر كلمات  
مكتوبة من المصاييح الكهربائية كما هي العادة في  
بلدان الشرق الأوسط مكتوب فيها محمد(ص) والله  
(عز جلاله)



بزماناتي كنت قاعد بالفرنكة ببيتنا بأخر  
الصالحية... يعني قريب من الشيخ محدين هلق...  
والفرنكة ببيتنا يعني دروشان... مو كل هالقد... غرفة  
قبل الاسطوح... وقدامها درابزين معبا تنكات سمنة  
فاضية أبي جايهن من التكية، فيها تراب، ومزروعة  
بالشب الظريف والياسمين العراتلي وبزاز الكلبة  
وراخي شعره... الى آخره.

هنيك كنت قاعد عم احفظ ألفية ابن مالك، لأنو  
الحجي أبي وعدني بألفين ليرة إذا بسمّعها قدامو وقدام

الشيخ مطيع وبرفعلو راسو بالحارة قدام كل المشايخ  
والجيران، لأنو الشيخ مطيع كتار حكي والحارة  
كلها بتتطبل بالقصة إذا بيحضر هيك سهرة... على  
كلن وقتها قللي الحجى أبي: إذا حفظتها بتكون  
سبقت ابن الحاج عبد القدوس اللي عمره 18 سنة...  
وكان عمري وقتها 16 سنة.

وأنا قاعد عم بحفظا والسما معباية سنونو... والدنيا  
عند المغيب يعني قبل صلاة المغرب بشي نص ساعة...  
والهوا حامل معوا التذكير والفواتح وشوية أدعية  
وأناشيد... مع الدخان الأبيض تبع اللحمة المشوية من  
عند اللحام، وإذا بسمعلكن صوت موسيقى فرنجية...  
يا دوب مسموعة... العمى قبّ شعر بدني قبّ... وشارع  
المدارس اللي مليان موادن عم تصدح، ضايح ضوح قبل  
الصلاة.. بتطلع موسيقى فرنجية...

حسيت بالحمية... وطلعت على الأسطوح، الدنيا كانت  
فاضية فوق، والبيت كان فاضي... الأسطوح تبعنا  
كان فيه بساط عليه فليفلة حمرا يابسة وبساط تاني  
عليه بامية ديرية مشان المونة وشوية صواني رب  
البندورة... نطيت فوقهن، واتعربشت على السور...  
تنوئزت نوئزة شوي شوي... وكان الصوت عم يعلا...  
وكلما ما كنت قرب وشي من حفة السور، كان  
الصوت يعلا ويعلا، لحد ما فقس بوشي ضو كثير  
قوي... مثل البرق لمع بعيوني... العمى... بنات، العمى...  
شقر، سوفور... عم يرقصوا وحدة منهم حاطة رجلها  
بالبحرة ولابسة شي قصير... يا قوة الله...

رجعت لتحت نزلت تحت السور وبلشت سمع ألفية  
الشيخ... العمى قول المقطع وعيدو وزيدو ، يفوت من هون  
ويطلع من هونيك ولا كآني صرلي ساعات عم بحفظ  
شي... ولا شي ، توترت وبلشت أرجف ... بعد شوي...  
حرقصني الفضول... وقمت تنوئزت مرة ثانية... كانوا  
بنات مثل الملايكة... مثل القمار... شقر وبيض وسوفور ،  
عم يرقصوا على موسيقى خفيفة فرنجونية... العمى لك  
هدول الأجانب المستأجرين الجداد اللي عم يدرسوا  
عربي ببيت أبو عدنان... هدول باب بيتهن ييفتح بالحارة  
التانية ، مشان هيك ما شفتهن من قبل.

ضليت عم اتفرج... كانوا مبسوطين... بنات على بعض...  
حسيت حالي حقير ومنافق... بس والله يارب ما قدرت ،  
ما قدرت انزل...

كنت مربوط بخيط من ذهب شاددني من عيوني وما  
عم اقدر شيل نظري عنهن... كانوا عم يحكوا مع  
بعض بهدوء واقفين وعم يتمايلو... في... وحدة كانت  
بآخر الليوان عم ترقص وتدور لحالا... وكأنها  
بحضرة ، مغمضة عيونها ونسيانة العالم... ووحدة تالته  
كانت قاعدة وحاطة رجليها بقلب مية البحرة وعم  
تتطلع على المي... وعم تفكر ما بعرف بشو.

وفجأة هي يلي بالبحرة رفعت راسها وبضرية وحدة  
وكانها شايفتني ، اتطلعت علي وعملتلي باي.

العمى حسيت حالي قاعد بالزلط ، قدام كل أهل  
الحارة ، يارب ارحمني... ارحمني



الجوقة

: (اغفر له يارب، يارب اغفر له).

واتكرفتت كرففة من على السور... وقعت وجرحت  
كوعي، وشي مثل البندورة الحمرا، بلشت اركض...  
نزلت الدرج... وطلعت من الفرنكة ودحكلة عالدرج  
على أرض الديار، فتحت الباب... كانت أمي فايته هلاً  
عالبيت، قالتلي: وين؟  
مارديت وضليت راکض.

وشارع المدارس كان عجقة وأنا دفش بهالناس..  
وركضت وفتت تخبيت ورا مقام الشيخ محي الدين...  
رفعت الغطا الأخضر اللي فوق الضريح وخطيت راسي  
وقعدت وبلشت ابكي وادعي لربي يسامحني.

الجوقة

: تردد دعاء الغفران:

(يارب اغفر... يارب اغفر)

(يارب ارحم... يارب ارحم).

وضليت طول الليل قاعد عم سمع الألفية بالجامع، لحد  
ما طلعت الصبح، صليت صلاة الصبح ورجعت  
عالبيت... طلعت على باحة الجامع وكان فيه حمام عم  
ياكل كسارة الخبز والذرة اللي بيرموها الناس... فتت  
بين الحمامات وكملت طريقي والحمام ما اتحرك  
وكأني مو موجود مشيت شوي بعدين انتهت!! درت  
وجي عالحمام وكانو عم ياكلوا ولا كأنوا في حدا  
مرق رجعت مرقت وما تحركوا... مشيت شوي باتجاه  
البيت وما سمعت غير الحمام طار، التفتت فشفت واحد

هلق فات عالجامع ومرق من بيناتهن متلي فخافوا  
وطاروا...

كان البيت كلو فايق، وأمي عم تبكي وأختي ارتفعت  
حرارتا... والحجي كان قاعد عم يسبح بالعداد، يمكن  
وصل لشي مليون عدة يوما.

قتلهن: كنت بالجامع عم احفظ الألفية، اتطلع فيني  
وسكت الكل، أمي وأختي وأختي الثانية والكل عم  
يستنى يسمع كلمة مني... قللي بصوت جهوري... أين  
كنت طوال الليل وصرخ: أجب يا عاق... وقفت: وبلشت  
قول أبيات الألفية من أول... اتطلع هو وشوي شوي بلش  
وشوا ينفرد وحواجبو يبعدوا عن بعض وكل ما قول بيت  
كان وشو ينفرد لحد ما صارت ضحكته لعند أدانه  
وأمي صارت تبسمل وتدعيلي، وأختي انخفضت حرارتا  
وأنا صرت علي صوتي وبدع وقول وارفع صوتي وقول...  
ألف بيت من الشعر الخالص والحكمة

الجوقة : (بارك الله فيك بارك الله فيك).

ألف بيت من الموعظة والاعتبار وقواعد اللغة، كلها  
سمعتلو ياها..

وقف أبي وتركني وطلع من البيت وأنا كملت  
وكملت، حسيت بحالي، بيوما حسيت بدمعتي الغالية  
على خدي... ووقت خلصت ضمتني الحجة وبوستني  
وقالتلي يعلي عليك لا تغديت ولا تعشيت... رح أعملك  
فطور وقعدت وفردتلي هالسفرة جبنة بيضا ولبنة

وزيتون وزعتر وصحن كبير بيض مقلي مع قاورما ،  
تطلعت بالصحن وقلت يا رب...

طار عقلو أبي وحمل حالو وطلع من البيت وتاريخه راح  
خبر الشيخ مطيع والشيخ عبد القدوس ، وبالليل عمل  
قعدة عنا بالبيت وانفتحت صواني المحلالية والرز بحليب  
وانفردت صواني الشاي والقهوة المرة والقهوة البيضاء ..  
وريحة المازهر عششت بالحارة لشي ثلاث أيام... إبيه...

وقفت بأرض ديار الشيخ مطيع والثاني كمان كان متل  
أبي أخذها حنبلية وعازم هالمشايع والمريدين والزوار ،  
وقفت بالنص وبلشت سمع وجود ، كنت عم قولها متل  
كأني عم غني وفرّد والبيت اللي كنت حبوا كنت  
عيدو وفرّد فيه ووقت خلصت ما حسيت حالي إلا وقعت  
على الأرض وجبيني متل النار...

وأنا محموم بالمنام... شفت حالي بمكان متل الصحرا  
وعن بعيد في شوية شجر وجدول مي صغير... كان معي  
عالم ما يعرفهن وكنت راكب حصان... قريت بالحصان  
من الغزلان... والغزلان كانوا حلوين متل النسوان... قريت  
واتفاجئت اني حامل سيف... وعبرت بين الغزلان وهيه  
ضلت عم تشرب وتاكل وكأني مالي موجود... ماخافت  
مني ولا من سيفي... ووراي عبر فارس كمان حامل سيفه  
فرفعت راسها الغزالات وهربت بسرعة... التقت فما عاد  
شفت حدا حواليي ، نزلت لأشرب مي وأنا عم بشرب  
شفت خيال واقف ورايي... رفعت راسي فكان رجال  
كبير بالعمر ، النور طالع من وجهه ، ولابس أبيض

بأبيض: قنباز صايا بيجنن وعليه حطة بيضة... قللي:  
السلام عليكم: رديتلو السلام... وسألته: مين أنت... قال  
أنا ختم النبي الهاشمي عليه الصلاة والسلام... محي  
الدين محمد بن علي بن العربي...

قلتلوا يا شيخي أنا ارتكبت معصية... ألا وهي اني  
تلصصت على بنت الجيران وتفرجت عليها ويمكن  
كون حبيتها وهي ما لها حنفية ومسلمة...  
جاوبني... أما الإسلام..

فقد صار قلبي قابلاً كل صورة

فمرعى لغزلان ودير لرهبان

وبيت لأوثان وكعبة طائف

وألواح توراة ومصحف قرآن

أدين بدين الحب أنى توجهت

ركائبه فالحب ديني وإيماني

.. قتلته: بس يا شيخنا شففتها وهي عم ترقص!

فقال: الرقص أقرب طريق للإنسان ليقرب من الله وهو  
أول صلاة ابتكرها المؤمن ليقرب من الروح والذات  
الإلهية... لا تخاف طالما قلبك مغمور بالحب فأنت دائماً  
على حق، وكل الطرق اللي رح تمشي فيها رح توصلك،  
طالما بوصلتك الإيمان.. واكبر دليل هو السكينة اللي  
منحك ياها الرب...

قتله: يا شيخنا ليش الحاج زين العابدين أبي بيضل  
يدعيلك بالهدى..؟

قال لي:

أنا المطرود من بين الموالي

ومثلي من يصد عن الوصال

رمىت بأسهم الهجران حتى

تداخلت النبال على النبال

أنا العبد المضيع حق ربي

فكيف تضيعني يا ذا الجلال...

اللي عم يعملو الحجى عملوه كتير قبله، بس قلبه أنو

هوه لازمو شوية رقص ليقدر يتطلع لفوق ويشوف اذا

كان فيه يسمع شو بيقول الرب جلّ جلاله...

تاني يوم عالطور قعدت وكنت نايم كتير وعيوني

مبجبة، وأنا عم اكسر أول بيضة، اتطلعت فيني

الحجة وقالت لي: يا ابني يا عابد أبوك بدو ياك...

وفتت على غرفة أبي: وكان هو قاعد على دكة عالية

ودقنه بيضا طويلة ولابس جلابية بيضا كمان... كان

ماسك مسبحة طويلة كتير كتير واصله من أول الغرفة

لآخرها، من خشب الصندل وعيونوا ما عم يتزحزحوا

عني... قال لي: شو قال سمعوك عم تهلوس بمنامك

مبارح وتقول نسوان ورقص وحب. شو القصة يا عابد؟

قلت له واللّه ما بعرف، بس يا حاج أنا لازم لاقى طريقة :

عابد

لاتقرب من اللّه أكثر انا ما عم ترويني الصلوات

الخمسة، ولا باقي الأركان، حاسس أنو فيني أعمل

شي أكثر لحس حالي قريب من الرب، قريب من

حبيبي رسول اللّه...

صرخ فيني وقال: اخرس ولا تزد حرفاً فالله أمرنا بالعبادات ولم يطلب منا أكثر من هذا وكل ما هو زيادة حرام يا أيها المؤمنون كتب عليكم الصلاة والصيام والزكاة والحج لمن استطاع إليه سبيلاً... على كل الأحوال أمل ألا يخيب ظنك!! فالحاج الشيخ عبد القدوس كان يتأملك البارحة وقد تفحصك من أخصم قدميك لأعلى رأسك وقد أعجب بك وطلبك لجماعته.

هون طار عقلي أنا من الفرح بس كمل أبي وقال: لكنني رفضت، هو كان قد طلبك لجماعة الميلوية... يريد أن يعلمك الطريقة والرقصة، الحضرة والزار... اللهم افتح على أولادنا يارب، ولكن كما تعلم فهذا حرام... (هنا تسقط الاضائة على الأب وهو على مرتفعه، وعلى الابن الجاثي على الأرض في شبه سجود)

عابد : (يصرخ) دخيلك يا أبي دخيلك !!الله يخليك لا تحرمني يا حجي من الوصال... ببوس ايدك أنا عم بستنى هيك فرصة... يا حجي الله يطول بعمرك... أنت بتعرف إني تريايتك ويخاف الله، وبتمنى عيش على محبته وحسه... دخيلك لا تبعدني عنو، قربني منو. (هنا تتحول الجوقة لتصبح هي الوالد، حيث تختبئ خلفه وتتكلم )

الجوقة : استغفر الله العظيم... استغفر الله العظيم.. الجوقة مع الأب: يجب أن أحملك من نفسك، يجب أن أحملك من طيشك، إنه واجبي

: ببوس ايدك يا حاج لا تكسر قلبي... أنا بدي ارقص  
 بحضرة رسول الله... لحد ما تطلع روحي مني، الله  
 يخليك.. الله يخلينا ياك...  
 تتقسم الجوقة قسمين: آمين.

وهون لما شافني منهار من البكي ومنتسطح عالارض  
 راح موت... قال: إذن سأثبت لك خطأك وسأسمح لك  
 ولكن ضمن شروطتي..

اللهم افتح على أولادنا يارب... آمين .

اللهم افتح على أولادنا يارب... آمين.

امي واخواتي البنات صارو يبكوا من الفرح....

وأبي قعد هيك ورجع كرسيه لورا وصار يدعيلي  
 بالتوفيق بصوت واطي وعيونه غرغرت بالدمع.

أنا صرت اتضحك... مالي عرفان شو... بس حسيت أنو  
 هي شغلة كثير عظيمة ومهمة، فرصة العمر يلي عم  
 بستأها من زمان...

طلعت على غرفتي... واتسطحت وادني اليمين عم تسمع  
 التذكير والابتهالات وادني الشمال عم تسمع الموسيقى  
 الفرنجونية الجاية من بيت الجيران، من عند  
 المستأجرين الأجانب... ونمت

وبعد كم يوم أخذني أبي من أيدي الصبح بكير على حمام  
 السوق، تحمنا سوا وقلو للمكيس قاطو قلطو وكانو  
 اليوم عرسو... بدي ياه عم يضوي ضوي، كما الثوب  
 الأبيض الخالي من الدنس، وشوشوا بإدنو وراح عالجواني...





قلي اشلاح البشكير..

قلتلو لا وحق النبي ما بشلحو...

قلي: عم قلك اشلحه.!

قلتلو: لا وحق النبي مالي شالحو هي عورة،

قلي لكن خود انت وفوت عالجواني... وفتت... وانا

عم بتخيل حالي بليلة عرسي وحببية عم تنتظرني بالبيت

لابسة الروب الأبيض.... .

المهم طلعت عالبراني وكان الحجى عم يشرب زهورات،

اطلع فيني وقلي: نعيماً يا عريس... نعيماً يا مولانا... !

الجوقة : ( تردد الجوقة أهازيج تردها عادة العراضة الشامية

للعريس قبل عرسه)

والكل كانوا عم يتطلعوا فيني وأنا ملفوف بمناشف

ولوني أحمر مثل الشوندر، وبعدين طعماني فول

واشرينا شاي وامشيننا... عالمدرسة الجهاركسية،

بشارع المدارس... فتت وكان الشيخ عبد القدوس قاعد

عالأرض مستند عالحيط وحواليه مثل الدائرة قاعدين

شباب من الخمسة للخمسين.

رمى الحجى السلام وراح... أنا خفت شوي... لاء خفت

كثير... اتطلع فيني شيخنا عبد القدوس وقلي: قعود يا

ابني واسماع شو عم قول... وقعد يحكي ويحكي،

وكل شوي يستشهد بمأثورات الشيخ الأكبر ابن

عربي... يلي أنا كل عمري مفكر اسمو محي الدين

العربي... وشوي شوي...

هريت... شردت... وسرحت بأفكاري... وطلعت قدامي

البننت يلي عم تعملي باي

وشوي صرخ علي الشيخ وقلبي وييين، يا ابني!!

بها المصلحة ما فيك تشرد، بدك... تتأمل وبس وتفهم

وتناقش وبس، أما إنك تبعد وتفكر بالأمر الدنيوية

السخيفة ما فيك، قتلو: حاضر....

وكمل وهو عم يحكينا عن محبة الله والرسول

الكريم وانو كيف نحنا واجب علينا أداء الفرائض

والسنن كما أمرنا بها الله ورسوله... وقت كنت أنا عم

فكر بالحب والمحبة اللي قللي عليها الشيخ بالمنام...

وصارت كلمة دين الحب اللي قللي ياها ترن براسي مع

صورة البننت اللي شفيتها...

ومرقت الأيام واجينا يوم من الأيام عالعملي، أنا وواحد

شب من جيلي اسمو عبدو، نحيف ومسنكح وشواربو

خراطيس خراطيس..

وقف قدامنا الشيخ وقلنا خدوا البسوا هدول تياب

ال دراويش، وانتو بتعرفو ومتل ما قلنا...

الدوران هو أساس الدراويش والمولوي... والدوران هو

أصل الكون كلو... متل ما خلقو الله سبحانه وتعالى..

الجوقة : تعالي اسمه وسمى...

تعالي اسمه وسمى...

الكواكب كلها معلقة بالسما بقدرتو وكلن عم

يدوروا حوالين حالن وحوالين الشمس وحوالين المجرة

ومتل ما قال سبحانه وتعالى (وكل في فلك يسبحون)...

وصدق رسوله الكريم.

يعني انتو بدورانكم هاد اذا عرفتو تعملوه بتكونوا عم تتواصلوا مع الدوران الكلي للكون، مع سر الكون وايقاعه وسر الخليقة، ومع الحركة الكبرى للحياة والبشرية، ومع دورة الحياة والطبيعة والبشرية...وانتو كل ما تدوروا بتكونوا عم تتصهروا مع المجموعة ومع الجماعة لتفهموا معنى الجسد الواحد... وهون طلعت قدامي صورة صبح ابن أبو صبح... وخفت شوي !!!لأنو انا مابدي حدا يفهمني الحب أنا وصلت للحب لحالي وعرفت معنى التفاني وصرت ادعي لربي.. وكمل الشيخ: لازم تحسوا باللي حواليكم مشان تكونوا كتلة واحدة.. !!

فتحت أنا وعبدو تامانا فهمانين ومو فهمانين، يعني حسيننا أنو هي الفتوة... كثير بعيدة عن حارة الشيخ محي الدين وورق الخس وبياعين التهريب وكل هالأمر..

على كل الأحوال قلنا دوروا على مهلكم، وشوي شوي وقت تدوخوا وقضوا، بلشنا ندور، وندور، دخت وقعت على وشي وقمت وكملت ورجعت دور ودور ودور، وأنا عم اتطلع بطرف عيني على عبديو... يلي كان مثل دويخة العيد عم يدور... مثل البلبل عم يدور... وبعدين بخبطة وحدة على وشو فات بالباب، انكسر أنفو نزلو دم وزادت حلاوتو حلاوة.



ندور... وفكر أنا بحبيبة الشقرة، وهي حاطة رجليها  
بالبحرة...

هيك سميتها أنا... حبيبة.

(يرتفع المولى عابد في الهواء بثوبه الأبيض وهو يدور)

صرت اتخيل حالي عم علي بالسما ولف حوالين النجوم،  
والقمر، واتطلع على حبيبة من فوق وهي عم عملي باي  
من البحرة، كنت حس أنو هالدورة حوالين حالي  
وهالدوخة يلي عم تصير معي أحلى شي بحياتي، وقدر  
ليش أهلي طار عقلن، ودور وعلي وحس كأنوا في ايد  
بيضة ممدودة الي من السما، وصرت دور والدمع نازل  
من عيوني وانا عم ارتفع بالهوا لحالي: وقتها طرت فوق  
المدرسة وفوق الدراويش والكل كان تحتي وانا متل  
المروحة عم لف وعلي، وارتفع... طرت فوق الحارة وفوق  
جامع الشيخ محي الدين، وعليت أكثر وقت شفتوا عم  
يضحكلي ويقلي: علي... علي، وطرت فوق الشام  
والبسطة والفقرا، وعليت فوق دعاوي الناس وأبي اللي  
ماسكها حنبلية، وعليت فوق الصبر والآهات والظلم...  
حسيت حالي قريت من الفرح وقريت من البياض... ما  
بعرف ليش... وعليت أكثر وصار نورعلي، حسيت حالي  
نار ونور، والشام كلها تحتي والناس عم تقول لي: الله  
أكبر الله أكبر، رفعت راسي وخشعت ياربي بحبك  
بحبك شكراً على هالشوفة، شكراً على كل شي....  
حسيت ما فيني قول غير شغلة وحدة: أنا بحبك يا ربي...

قام ظهرلي الشيخ محدين وقال لي: ليش؟

قلت له: لأنو خلق حبيبة وخلقنا جميعاً على صورته في  
أجمل تكوين... يعني يا شيخي صرت حس حالي وقت  
أتذكر وجه حبيبة حس حالي عم انظر للنور... والنور  
يغشى عيوني والدمع ينزل من جفوني مثل الولد اللي  
مشتاق لأمو... يا رب بحبك... دخيلك لا تحرمني  
وصالك... يا رب دخيلك عطيني لأعطي الناس محبة من  
صورتك الكريمة يا مجيب الدعوات يا الهي يا رحيم...

الجوقة وبنفس الوقت (أستغفر الله العظيم: أحب  
شيحك، أحب معلمك، أحب الرسول الكريم)

وعلى صوت الشيخ اندبجت عالارض واوقعت فوق  
ال دراويش، قام لعندي الشيخ وقلبي شوف انت وعبدو  
أجيتو سوا وعبدو صار سابقك بمراحل... شوف شلون  
عيونو معلقين بنقطة بالفراغ، وعم يدور مع البقية  
بانظام، شوف فردة ايديه وتركيظه، قلتو إذا  
بتسمحلي يا شيخي أنا عم حب دور لحالي يعني وقت  
حس حالي لحالي بسلطن، ووقتها بحس حالي معهن  
ياشيخي، أنا وعبدو كل واحد الو طريقتو...

صرخ علي وقلبي: شو طريقتو ما طريقتو... هون في  
طريقتي أنا وفي طريقة مولانا الشيخ جلال الدين الرومي.  
الله يرضى عليك قبل الحفلة قدام الشيوخ بتشرب قنينة  
عصير الليمون هي... الليمون بيساعد البصلة السيسيائية  
وما بتختل ولا بفق توازنك، ركز وثبت رجلك وادعي  
لربك، ياالله ارجع،

الجوقة : (تعود للدق على الرق وإنشاد الله الله الله الله الله)

ورجعت دور ودور ودور ودور واتذكر حبيبة واتفشكل،  
ما أحلى وشك يا حبيبة وأنت لابسة الحجاب أخ يا  
حبوبتي الله يهديك ويصلحك لو بتلبسي الحجاب...  
والمناطو ما أحلاك والشيخ يقلي شوف عبدو اتعلم من  
عبدو، عبدو بيسوى راسك.

الجوقة : (شوف عبدو اتعلم من عبدو، عبدو بيسوى راسك.

شوف عبدو اتعلم من عبدو، عبدو بيسوى راسك)

صرت اكرهو لعبدو... صرت احقد عليه وادعي عليه،

الجوقة : (الله لا يوفقك... يارب تقع..

الله لا يوفقك... يارب تقع.. )

عبدو خرابي، عبدو دمرني وحبيبة حبيبتي... لك يخرب  
بيتو على نظرة هالعين يلي لألو، حجر عينو ثابت مثل  
الصنم والعياذ بالله.

الجوقة : (والعياذ بالله

والعياذ بالله)

وأنا ما كنت اقدر ثبت نظري بشي قرنة كنت أول ما  
دور غمض عيوني واتذكر حبيبة وهي عم تشيل العشا  
وبعدين أنا وياها قاعدين وحاطين رجلينا بالمى بقلب  
البحرة وعم نطرطش بعض وهي تطرشني وأنا طرشها  
وعم نضحك..

وأنا عم اتذكرها وحوالي شيوخ الطرائق والأئمة  
وأصحاب الدين ومع إنني شربان قنينة عصير الليمون

كلها، بس أنا كنت فوق... كنت بين النجوم وعم  
اتطلع على حبيبة تحت، عم عملي باي، وفجأة حسيت  
حالي هويت بفرد مرة، من سقف السما على بلاط  
أرض المدرسة وعلى وشي...

الدرأويش ضلو عم يدورو لأنو الطبيعة والحياة ما بتوقف  
مشان واحد عاطل، هيك قال الشيخ..

واتطلع الكل عليّ، وقلعني الشيخ عبد القدوس... قلبي  
روح صفي ذهنك ونقي روحك وارجاع لعندي وقتها، الله  
يصلحك.

ورجعت عالبيت... لابس تنورتي وقنبازي وعالطريق وعلى  
مفرق الحارة شفت حبيبة ماشية... قمت تبيست متل يلي  
الله داعي عليه ومتل الصنم...جمدت.

الجوقة : (والعياذ بالله... الله يجيرنا... الله لا يوقعنا... اللهم لا تمتحننا..

اللهم بعد عنا الحرام.. )

اتطلعت فيها... واتطلعت فيني وبعريية مكسرة قالتلي:  
كيفك يا مولانا؟ وقبل ما تسمع ردي مشيت.

(يصرخ): أنا مولانا... أنا مولانا... أنا مولانا ولك أنا بدور  
لحالي، ولك أنا مولانا يا شيخ عبد القدوس أنا مولانا يا  
ناس، وأنا وقت دور بغمض عيوني وبحلم فيكي  
ياحبيبة... أنا عاشق... أنا ياربي... أنا بحبا، لك الله  
يرحم اللي قال:

شربنا على ذكر الحبيب مدامة

سكرنا بها من قبل أن يخلق



ورجعت على البيت وفوراً على الأسطوح، اتطلعت على  
بيت الجيران كانت قاعدة وحاطة رجليها عالبجرة،  
وعم تحكي عالتلفون.

طار عقلي من الفرح... قلت أكيد عم تستناني وقتلا...  
بصوت عالي: حبيبة يا حبيبة..... ما سمعتني..

الجوقة : (تردد معه) حبيبة ... يا حبيبة!!

قام اتطلعت حبيبة لفوق وبعضية ردت عن رجليها  
وقالت: أني مال... قليل أدب!! وفاتت لجوا....  
(صمت)

ومتل الي نزلت عليه كل سطول المي الباردة يلي  
بالعالم... وصارت حرارتي فوق الألف وحسيت أنو النظام  
الكوني كلو وال دراويش كلن انخبطو بيعضن، وبلشت  
دور ودور ودور (يبدأ الممثل بالدوران). مشان بس اتذكر  
لحظة حلوة... وانا عم قول: يا ربي...

كنت عم دور وعيوني مفتحة وحجر عيني ثابت مثل  
الصنم كنت عم دور بدي طيربدي روح من هالدنيا، يارب  
(يرتفع صوت الرق والطبل وتبدأ الجوقة بتريد تعابير  
الذكر والمليوية)

الله الله ياالله... .. مدد مدد مدد.....

ياربي ارحمني... يارب اغفرلي... ياربي خدني لعندك...  
أنا ما بشبه حدا... أنا... ما بدي كون قاورما..... قاورما  
لحمة بقلب بعضها... ياربي خليني أنا البصل... يارب أنا  
البنّي آدم أنا... أنا.

(ومع تصاعد صوت موسيقى الحضرة... .. يستمر مولانا بالدوران حول نفسه بسرعة... بشكل دوران لادور له فيه... دوران يجذبه ويقبده وكأنه ليس هو من يدور... بل قوة ما خارقة تجعله يدور) وهو يقول: ولك أنا... أنا...

الجوقة : (أعوذ بالله من كلمة أنا)

مولانا: لك هاد أنا أنا... أنا موجود أنا هون .

الجوقة : (أعوذ بالله من كلمة أنا أعوذ بالله من كلمة أنا..)

تزداد موسيقى الرق والطبول علواً ومع ازديادها يزداد صراخه

ولك هاد أنا أنا، أنا اسمي عابد، أنا أنا... بدي دور وأنا مغمض عيوني... ما بدي فتحهن... وليش لفتحهن... ولك أنا أنا بدي طير وعلي...

الجوقة : (أعوذ بالله من كلمة أنا أعوذ بالله من كلمة أنا... )

مولانا: أنا عابد... أنا عابد... عابد وبس... عابد وبس... مالي عبديو مالي عبديو... أنا عابد لنفسي... أنا بحبو ومالي خجلان أن بحبك ومغرم فيك ودمعي لوصالك مهدور يا حبيبي يارسول الله، يا رب أنا عابد إليك يارب... أنا أنا

الجوقة : (أعوذ بالله من كلمة أنا أعوذ بالله من كلمة أنا..)

تزداد موسيقى الطبول والدفوف توتراً

الجوقة : (كلمة أنا... كلمة أنا... كلمة أنا).

مولانا: أنا أنا... انتو... انتو... أنا .

يستمر مولانا في الدوران والدوران حتى يتهالك على  
الأرض تعباً... متوسطاً تنورته جاثياً كالصنم، محنياً  
رأسه.

مولانا وهو مطرق الرأس: آخ يا شيخ محدين...

آخ يا شيخي...

آخ لو تعرف...

(تمت)

الفارس الذهبي

دمشق 4\9\2007

ت 05-01-2008



ليلى والذئب...



## الفارس الذهبي

### ليلى والذئب...

ملهة مسرحية معاصرة ذات فصل واحد





الى كل أطفال العالم الذين لا ينامون أثناء  
روي حكاية ما قبل النوم...  
ليلى والذئب



## عندما يتحول الرمز الى حكاية

تقديم: حكيم مزوقي

هكذا، ببساطة المتمكّنين، وبحسّه الطفولي المشاكس، ويلمسة من قلم ملعون، يجعل الفارس الذهبي من ليلي والذئب قصة حبّ مدهشة. عادة ما نروي ونذكر كل قصص الحب في التراث الإنساني بتقديم الذكر عن الأنثى: قيس وليلى، روميو جولييت، كريستيان وزويا، مموزين..... ماعدا هذه المرّة تتقدّم ليلي بالظهور على الخشبة وتمسك بأطراف خيوط الحكاية، لتسجها على منوالها ومزاجها دون خوف شهرزاد وعقد شهريار.

ليلى والذئب مسرحية تتعق من ثقافة الرعب والوصاية والتردد، وتقتل الذئب في الذئب، وتحول لون الدم إلى كرز شهى الحياة وتعترف أنّ أطول الطرق هي أجملها وأن أقصر الطرق هي للعابرين بلا أثر. يذهب الفارس الذهبي إلى فكرته بوضوح وسلاسة ومهارة في اللعب إلى أن يصفع المتحجّرين وأعداء الحياة بقفّاز من حرير.

ليلى والذئب مسرحية نحن في حاجة إليها منذ زمن سحيق، كي لا تتكلم بنادق الماضي الصدئة وتغتنل أصوات المحبة والتطلع إلى الشمس. لعلّ أهم ما يميّز هذا العمل أنّه يتوجّه إلى كلّ الفئات والشرائح والأجناس والثقافات، فيجاورها دون استعلاء أو ابتذال، وهذه ميزة الأعمال الكبيرة والتي سنتمكن من قراءتها عبر عشرات التأويلات.

## مقدمة لا بد منها

النص هو دعوة الى الحرية ، دعوة الى المغامرة والنزوح نحو الاكتشاف لكشف المجهول، حتى تكتمل التجربة الإنسانية الفردية، وخاصة لدى الفرد العربي الخاضع والخانع لثقل الموروث الاجتماعي والتاريخي والإنساني والثقافي العربي، الذي توقف عند الإتياع ولم ينتقل إلى الإبداع، والذي توقف عن التطور منذ آلاف السنين موقفاً معه تطور الفكر والتجربة وهذا مما جعل تجربة العقل الغربي تسبقنا بمراحل.

إن الخروج عن المألوف وكسر العرف والتقاليد، هي بدع في مجتمعاتنا وينظر عادة للمتمرد أو المتمردة نظرة سلبية من عموم المجتمع بغض النظر عن موقف المجتمع الضمني من الفعل الذي اتخذه الفرد، وهو غالباً ما يكون فعلاً مشتهى من قبل المجتمع ككل .

فمثلاً إن اضطهاد شريحة من المجتمع السوري لأبي خليل القباني، واعتبار ما فعله من مسرح هو بدعة، يأتي من ضمن هذا السياق الذي تحدثت عنه علماً أن أغلب الحضور الذي واكب عروض القباني كان ينظر لما يفعله نظرة اشتهااء ورغبة في التقليد، ولكن النزعة التدميرية لكل ماهو ناشز عن المجتمع أو خارج السرب أو صاحب الريادة في كسر الرتابة

الاجتماعية، والإتيان بما هو ترفيهي حصراً أي بما يشكل دعوة للحرية والاعتناق من المؤسسة... هي ناتجة عن الغيرة وليس الحسد (فالغيرة هي محاولة للتشبه أما الحسد فهو ذو شكل تدميري للآخر) ومحاولة التشبه، وعند العجز... يكون الحل هو قضم ظهر التجربة، والتخلي والتضحية بالنعجة الضالة ليستمر القطيع في نهجه الهادئ.

إن المجتمعات السكونية أي التي لا حراك اجتماعي أو سياسي أو إقتصادي واضح فيها، تكون عادة أقسى على أفرادها الناشزين من أفرادها المسيئين، فالمسيء يعاقب لفترة ومن ثم يعاد تأهيله، أما الناشز فتبقى التهمة ملتصقة به لأجيال، ولذلك فهي تعاقب المرأة المتحررة في مظهرها أو في سلوكياتها مثلاً، عقوبات اجتماعية قاسية تأخذ عادة شكل النبذ أو الإقصاء أو الضغط على العائلة اجتماعياً، وأنا هنا لا أبرر للانحلال الخلقى، بل أدافع عن الحريات العامة والخاصة على حد سواء .

## 2

عادة ما تكون النعجة الضالة... هي التي يأكلها الذئب بشكل أسهل وأسرع، ولكنها تتمتع بفرديتها كحيوان، تتمتع بمناظر الوديان والسهول بشكل أفضل ولو لحين.

بعيدا عن ضوضاء القطيع ومزمار الراعي وعصاه، ودونما شعور بالتنظيم القطيعي فالنعجة هي حيوان في النهاية وللحيوانات طرق وأساليب للدفاع عن نفسها، ولكن الإرادة الإنسانية دجنت هذه الأساليب وصادرت القرار الفردي لها مقدمة لها الحل بحماية أفضل، من

الذئب... لأن الإنسان هو من سيأكل النعجة في النهاية... فالصراع في المحصلة هو صراع مصالح وليس عطف وتفضل من الراعي...  
في النهاية تبقى الحرية مفهوم نسبي متنازع على حسمه، ويبقى الخيار الإنساني موجوداً لدى الفرد في رأسه ولكن كل ما هو مطلوب منا أن نحرر هذا العقل ليقف الإنسان أمام خياره الوجودي وحيداً دونما إرشاد أو دليل.

في هذا النص استندت على الحكاية الشعبية المعروفة عالمياً ليلي والذئب والتي رويت لكل أطفال العالم تقريباً مكرسة مقولاتها المبطنة في طاعة الأهل والخوف من الخيار الفردي وإتباع المجرب.

لكنني قمت بعد التفكير بإعادة كتابة القصة من وجهة نظر محلية مستنداً على المفاصل الرئيسية في الحكاية ولكن بعد أن أزحت المفاهيم والمقولات عن مرتكزاتها لتتشكل مفاهيم جديدة لأجزم بصوابها، ولكنني أجزم بضرورة تجريبيها فإن فشلت أسقطت.

إن العمل هو ملهاة بسيطة لذا فإن الأداء يجب أن يكون أقرب الى الهدوء والى الروي الهادئ، كمن يقرأ قصة لطفل قبل أن ينام، والطفل هنا هو للجمهور ولكي لا ينام ينبغي لكسر الإيهام أن يفعل فعله.

للمخرج الحق الأكيد في تحديد خياره الفني فهو صاحب القراءة الأخيرة للنص والتي ستتجسد على الخشبة... المستويات في اللغة ضرورية للتدرج في الإيهام القصصي، من الحكاية الى الرواية الشخصية المعتمدة على تفاعل الجمهور أو الطرف الآخر مع الحدث المروي.. فالمستمع أو المشاهد يقترب من الشخصيات المتحدثة بالعامية حينما تتحدث عن نفسها في حالات البوح والتعري وتستمتع بإيهام القصة وكأن الحدث هو جلسة نميمة وتلصص، و لكسر الإيهام هنا دوراً محورياً في جعل المشاهد

يقارن القصة الأصلية مع القصة المروية ليستنتج التغير ومنه القصد من  
تبديل المفاهيم.

الفارس الذهبي

دمشق



المكان قسمين؛ في الأيمن طاولة وكروسي وصورة  
لامرأة جميلة ومغرية، وفي الأيسر سرير بشكل عرضي  
وفوقه لوحة لرجل وسيم.

يفصل بين المكانين باب مفتوح.

تدخل ليلي إلى القسم الأيمن من الخشبة... تتمشى قليلاً  
في المكان ثم تشعل سيجارة وتبدأ التدخين.  
في هذه الأثناء نسمع موالاً للرحابنة بصوت جبلي وقاس:

(عيني ما تدوق النوم يا ديب

حاكمها قلق ونعاس يا ديب

غدي تسرح مع التنيان يا ديب

وتفعل ما تريد وتشتهيه )

(مع انتهاء الموال.... )

: أهلاً وسهلاً بكم..

ليلى

لا أعرف كيف أبدأ... كونكم لستم بأطفال، لكنني لن أدعكم تتخيلون كثيراً الحكاية وسأقص عليكم قصتي... قصتي مع الذئب أو قصة الذئب معي، أو قصة ليلي والذئب، ليلي التي كنت أنا... سأقصها تماماً كما هي، كما حصلت معي دون تزييف أو تعديل وهي كما تعلمون (تقترب من المنصة أكثر مخاطبة الجمهور بقرب أكثر مع ابتسامة خبث) قصة حقيقية!

سأرويها لكم كأصدقاء كبار... كبالغين، كي ترووها بدوركم وبطريقتكم إلى أطفالكم، لكنني عندما أرويها لكم لا أريدكم أن تناموا مطلقاً، لا أريدكم أن تسترخوا... فأنا لا أرويها لكم قبل النوم، أريدكم أن تفكروا... أن تقلقوا.. على كل الأحوال هذا ليس مهماً..

لذا سأدعكم مع خيالكم قليلاً... كالأطفال... لكن القصة ليست للأطفال، فقصة الأطفال سخيفة وهي بعيدة عن قصتي... أريد خيلاً جديداً.

(تأخذ نفساً عميقاً من السجارة... تنظر للجمهور)

سأروي لكم قصتي معه... وأنتم تعلمون من هو، وتعلمون أنني كنت صغيرة وهو كبير... حتماً... في ماضى وانقضى.

تقريباً كنت في السابعة عشرة من العمر، وكان يا ما كان... ليس هنالك من الفتيات الصغيرات من اللواتي عبرن هذا العمر لم يحدث معهن حدث يتذكرنه طوال حياتهن! أو بالأحرى ما يحصل مع الفتيات في هذا العمر لا يمكن لهن نسيانه طوال حياتهن...

(تنفث نفخة دخان... وتتابع):

ففي هذا العمر لا بد للفتاة وفي صيف هذا العمر  
بالتحديد ، من أن تتغير حياتها تماماً... وإن لم... فما  
سيحصل معها سيظل محفوراً في قلبها الى الأبد...  
بدأت القصة معي حينما كنت أنظف الحمام...

وأنا أكره كثيراً تنظيف الحمامات بالذات ، لأنني  
سأضطر لاستخدام الماء الساخن الذي يزعج كثيراً ،  
حسب ما تقول جدتي: الجن والعفاريت ، سينسلخ جلدهم  
وهم مستقرون في البلايع ، من شدة الماء الساخن  
وسينتقمون من الفاعل حتماً.

انحنيت فوق البالوعة لأنزع غطاءها وأنا أبسمل وأتعود  
اتقاءً للجن فوق!

وقع خاتمي مني... من يدي ، انزلق بفعل الماء والصابون  
على يدي...

واندلق الماء الساخن حول المكان

سقط خاتمي الذهبي في ماء المراض.. !

يا الهي كم أكره المراض.. ! رأيته:

كان واضحاً لي بشدة... يلمع... انه في الأسفل...

كان المكان نظيفاً...

وكنت أعلم أن الماء نظيف لكنني لم أستطع أن أمد  
يدي وأنتشله من تحت...

كنت خائفة... كان الماء مضطرباً ، وعلى سطحه صور  
تتماوج... خفت... دمعت.

(يدق الباب... تنهض ليلى بهدوء وتفتح الباب، فيدخل رجل يلبس بذلة أنيقة... لكن رأسه هو رأس ذئب، يدخل ثم يجلس على الكرسي في عمق الصالة...)

(ليلى تستل سيجارة من جيب الذئب العلوي ثم تكلمه):  
قبل أن تبدأ القصة... لا بد لكم من أن تعلموا ماذا قال أهل أول لي.

(الذئب معلقاً على طريقة حديثها): ليش هيك عم تحكي؟

(ليلى متابعة)... وكما تعلمون أيضاً أهل أول ما تركوا شي إلا وقالوه... وبتعرفوا كمان

( ليلى للذئب وبعد أن تخلت عن اللغة الفصحى): هيك أحسن ما!!

أهل الآخر نحننا... كل شي بنسمعوا من أهل أول... بنسمعوا بس (الذئب يهز رأسه برضا عن استخدام اللغة العامية) وما بنفهموا لحتى نجربوا... ايه هي حال الدنيا... (تلفتت إلى الذئب)

أمي قالتلي بزمانها وما بعرف ليش... قالتلي وقت كنت صغيرة وبيتنا كان كبير ومعبا بالخيرات والشجر والورد... قالتلي: يا بنتي أهم شي النضافة... اعلمي كل شي... كلي كلشي... كلشي!! البسي كلشي! اشربي كلشي... ! كلشي بدك ياه بس شرط يكون نظيف! ولا تاكلي شي من السوق!... أبداً... أبداً!...

اغسلي ايديك ووشك... وديري بالك من شغلتين: الكرز والرمان... وصارت تبتم... يخرب بيتن هالأكلتين شو

بيدبغوا... لا تنقطي كرز على حالك لأنو دم الكرز  
مايبروح والأواعى بتدبغ مرة بالعمر، وخلصنا ماعاد فيه  
رقع أو قص أو أي شي خلص... بيضل اللون معلق على  
الأواعى البيض... بيدبغها دبغ وما بيبروح بالغسيل...  
وأنا بالفعل، من يومها بطلت أكل كرز بالمرة... كنت  
بحب اللون الأبيض، القطن الأبيض، كل شي أبيض،  
كنزاتي وبلوزاتي كلها بيضا ما دبغت بحياتها... خفت  
من الكرز يلوتها (الذئب يهز برأسه ساخراً) وهداك يوم  
وهادا يوم...



(تتقدم ليلي من أول الخشبة وتسحب كرسي، ثم تجلس  
عليه وتتابع):  
حاولت ثلاث مرات أني مد ايدي عالخاتم... بس قرفت  
من المرحاض...  
يا الله بس هادا خاتم خطبتي وستي نقتلي ياه...  
حاولت... بس في شي! مدري شو هو؟ منعني وخالاني  
وقف أتفرج عليه وهو بالمي...!  
طلعت على جنيئة البيت، شم هوا وفكر... بركي  
بيصفي ذهني ويعرف كيف بدي لاقى حل لها المشكلة...  
بس وقت رجعت عالحمام، تفاجأت بجدي طالع من  
الحمام وكان صوت مية السيفون مثل الشلال بأدنيي...  
انصعقت... انصدمت... كنت رح ابكي من فكرة أنو  
الخاتم راح مع الل..... !!

بس الحقيقة كانت أنه.. : جدي عملها على خطبتي...!  
بس أنا ما حاكيتو ولا كلمة، حتى أنو هوه تفاجأ لردة  
فعلي وقت شافني... فكروني تضايقت من أنوفات على  
التواليت مباشرة بعد ما نضفتوا؟  
(صمت)

قعدت بالجينة... موسيقى غريبة جداً.  
سكرت أدنيي بادنيي... رجعت جناحات أدنيي لأدام،  
وسكرت مجرى السمع من الغضب... (تفلق أذنيها).  
(صمت) سمعت دقات قلبي (نسمع صوت دقات قلب).  
سمعتهن... دقات قلبي... وحسيت، شي سميك أسود عم  
يتدفق جواتي...  
(صمت)

بس هادا مو مهم... (تعود لحالتها الطبيعية)  
هادا مو مهم... أو مو الأهم... اللي صار بعدين هوه  
المهم، بهداك اليوم  
اعتبرت اللي صار هوه علامة... إشارة إلهية بأنو أفسخ  
خطبتي... وفسختها... خصوصاً بأني بآمن بجدي  
واحساسو..

على العموم... أنا ما كنت حابة خطيبي وقت قررت  
أخطبه... وللصدق حتى بعد الخطبة، وقت كنت شوفه...  
قلبي بصراحة ما كان يدق من الفرح... كان يدق من  
الخوف والترقب... كنت قول: لك معقول أنا أربط حياتي  
مع شخص مجهول ما بعرفه، لك حتى ما تعرفت عليه...  
عرفتني عليه أومي..

قالت لي: لك هوه وسيم... لأ لأ جميل!

لك هوه غني... لأ لأ ثري!

لك هوه جامعي... لأ لأ مثقف!

لك هوه ذكي..... لأ لأ عبقرى!

لك هوه يسر... لأ لأ مطيع... تخيلي يا ماما!!

كل الصفات الحلوه فيه من الألف إلى الياء.

(تخاطب الذئب): بس أنا مع كل هالشي وافقت... بس

ما حبيته... كان بدي رجال وحش... يصرخ عليي وقت

كون مالة ونكدة... مو يركع تحت رجليي ويراضييني...

يحبني وقت ما كون طاقتوا! مو يقلي ok حبيتي.

على كل الأحوال (تخاطب الجمهور) طق عرق الجنان

بالعيلة... أمي... أبي... أخواتي... ستي... الكل حتى جدي

اللي كان الو الفضل بتركي لخطيبي... زعل..

تخانقت معهن كلهن... وتعايطنا... وطلعت من البيت

لأتمشى شوي، لبست الجاكيك الجوخ الأحمر تبعي... ما

بعرف ليش هيك صار... يمكن صدفة... يمكن لأنو هدية

من ستي، ومشيت بالشوارع... حتى وصلت عالجنينة...

(يتقدم الذئب من أول الخشبة)

: كانت السما رمادية... من كتر الغيوم... حتى أنك ما

قدرتي حتى تستمتعي بالشمس.

كان بدك تشعلي سيجارة بس ما قدرتي، خفتي من

نظرات الناس... كنتي وحيدة... والكل كان عم يتطلع

عليكي..

الذئب

ليلى : فستاني الأحمر كان النشاز الوحيد بهديك اللوحة... يا  
إلهي قديش كان هداك النهار حلو... (تستدرك) طيب  
رح كمل...

فجأة شفت شب مشي من قدامي وعم يتطلع علي.

الذئب : كنت شايفتيني وأنا فايت من باب الجنية...

ليلى : لفتت نظري أنت وقتها شوي... بس صدقوني أبداً ما  
اهتميت... أبداً...

تهيألي أنو بشع... لأ... مسكين... عادي كتير... نحيف  
كتير ومعضم ووشو عريض وألو دقن خفيفة...

الذئب : كنت لابس قميص رمادي وبنطلون رمادي أنيق كتير..

ليلى : (تهز رأسها) أيه... بعتمد أنه يومها كانت أناقتك شوي  
جذابة.

مشي من جنبي مرة ثانية...

الذئب : درتي وشك..

ليلى : مريت من قدامي مرة تالتة ورابعة وخامسة... بعدين  
استدتت على شجرة قريبة من كرسيي.

الذئب : درتي ضهرك كلياً عني.

ليلى : حسيته غليظ... سمج... متطفل... بينما كانت النسوان

والولاد والرجال عم يتسلوا ويتغدوا ويطعموا بقايا أكلهم  
للبطات والكل بهدوء كل واحد بشغله... إلا ولد صغير  
كان عم يبيكي كتير وما بعرف ليش، بدون ما يسكت.

الذئب : كنت أنا الوحيد، اللي بدي أتطفل على الشخص

الوحيد بها العالم... اللي بهداك الوقت، ما بدو حدا  
يتطفل عليه..



ليلي

: فجأة حسيت برشقات مي على رقبتى وشعري، بالبداية  
فكرت السما عم بتشتي... لأنه الغيوم كانت كتيرة ؟!  
تطلعت عالارض، كانت ناشفة ولساتها رمادية وأبدأ ما  
تتقطت بالأسود.

ليلي

(أثناء كلامها يحمل الذئب بخاخ ماء ويرشها ويبتسم).  
: رجعت نقط المي من جديد على رقبتى وشعري مرة ثانية.  
التفت بسرعة لورا، فشفتك حبيبي واقف ورايى... كان  
شكالك كتير غبي وأحمق!!(تبتسم له فيبتسم لها).  
(بغضب شديد) كان عم بيرشني بالمى... يا الله وجن  
جناني... وتلبست أمي وصرت متلها تماماً.  
(تلتفت نحوه، وبصوت عال تويخه)

العمى شو وقح... العمى شو غبي... عديم المسؤولية... شو  
مفكر حالك عم بتساوي عم تتهضمن يعني، العمى شو  
غليظ وبلا مربى (تخرج من الدور وتبتسم له).  
(الذئب يبتسم)

ليلي

: كنت فعلاً... (تتردد في قولها) غليظ...!

الذئب

: آسف... صدقيني... آسف... اعذريني..

شفتك قاعدة لحالك... قاعدة ومالة... عم تفكري  
وتفكري وتفكري بشي يمكن عم يزعجك... فحبيت  
شوي أني خلي الأمور رومانسية...  
لأنو إذا ما مطرت... فأنا بخليها تمطر عليكى وألك  
بس... مطر خصوصي إلك... خصوصي لحبيبتى.  
(ليلي تهمس للجهور) وقت قالها... حسيت بكركرة  
صغيرة، بأعلى راس بطني... وحسيت بشوية طمأنينة.

الذئب

: بس إذا مو جاي عبالك... بروح... طيب... رح روح.

ليلي

: شو ما عندك أخوات أنت، العمى ليش هيك عم تعمل مع بنات الناس... (للجمهور) وضليت ساكته مترددة... عم شوفه وهو رايح وعم يبيعد.

(تسمع من بعيد أصوات أبواق سيارات وأهازيج عرس شعبي من العراضة الى الزغاريد والدبكة)  
(الذئب يهدأ قليلاً ثم وفي حالة بوح).

الذئب

: رحيت ومشيت بس وأنا ماشي تذكرت قصة أختي الكبيرة وقت تزوجت فتحي، وأختي أكبر مني بشي سبعة عشر سنة، يعني هية هلق عندها ولاد وأحفاد حتى... لما تزوجت هي، أنا كان عمري شي سبع سنين تقريباً، وكان البيت كله يوم العرس قايم قاعد، وما في حدا عم يسمع لحدا، الكل مشغول، شي بالفستان وشي بالأكل وبالسيارات... والخ

وكنت أنا متل الحشرة هداك اليوم، ما كان في حدا منتكش فيني، وأنا اللي كنت الصبي الوحيد على خمس بنات والمدلل يعني آخر العنقود والسكر المعقود، حسيت في شي غلط في شي مو صح، كنت رح أبكي قالتلي أمي هاد صحن الفواكه بينحط قدام العرسان على الطاولة وكلوا كرز وخوخ والذي منه، بس قالتلي أوعك تاكل منو وتدبغ حالك لأنو بدي أخلص بواحد بس اليوم، كيف اتنين، أكيد أختك راح تدبغ كل أواعيها وفستانها الأبيض وقت ترقص هيه وعريسها الله يخليك دير باللك... ودارت وشها وطلعت وقفت على درج

السطح، وعيونها عم تدمع وبلشت تبكي... أنا يا لطيف  
حسيت في شي كتير كبير اليوم بده يصير، وقلبي  
كان حاسسني، رحتم لأتأكد وأخذ الخبر اليقين من  
بابا، فتتم لعنده قام دار وجهه فوراً وقللي الله يخليك يا  
أبي روح من هون، وحسيت كمان في دمة بعينه... أنا  
جنيت وطار عقلي ركضتم لعنده ودرتمله وجهه، قلت له:  
بابا شبك، قام ضممني وقللي: يا دياب، لك هي أختك  
هي... هي بكريتي ما بقدر... ما بقدر!!!

حملتم حالي ونتمتم من بين أيديه وطلعت على الحارة،  
وأنا عم ببكي حسيت أختي رح يصرلمها شي مع هاد  
فتحني الكلب..

وأنا قاعدم، اجوا لعندي أولاد الحارة الصغار... وكانوا  
زعران من الطفولة يعني، قرب مني جادو وقللي شو يا  
وعل... كيف أعصابك اليوم...

قلتمله ليش، قال وبلهجة فيها كتير حس المؤامرة: يعني  
اليوم أختك رايحة من عنكم لعند فتحني... وفتحني  
كان بالحمام اليوم وحلق شعره وكوى تيبابه وقصقص  
أضافيره، يعني هو جاهز...

قام أنا وقضتم وصرختم بصوت عالي: ليش! قام قال:  
يعني! جاهز لياكل اليوم!!!

وهرب وما عاد بين، وأنا انهتمت على ركبي، وعيونني  
كلها دمع، وصرتم من بعيد اتفرج على العرس، أمي  
واقفة عم تبكي وأبي داير وجهه وهنن عم يودعوا  
أختي... قام مسحت دموعي، وقرتمتم انو أنا تاني يوم رح  
روح وشقله بطنمه لفتحني وطلع أختي من كرشه البشع..

ليلى : يصمت الذئب قليلاً ثم تقترب ليلى منه وتضمه بحنان)  
وتاني يوم أكلت أتلة مرتبة من أبوك لحد ما فهمت  
القصة..

(ينظران الى بعضهما البعض، ثم تتجه ليلين نحو  
الجمهور وتتابع)



ليلى : وقت راح العرس وراح هوه حسيت بالملل أكثر، ما في  
حدا حاكيه، يا ريته ما حاكاني... ما فيني دخن ولا  
أعمل شي... فتحت شنتايتي، طلعت كيس الأكل اللي  
أعطتني إياه ماما الصبح لآخده لستي، بس المعركة  
الصباحية... خلتنى أنساه، تطلعت عليه، فوراً حسيت  
بالجوع، أخذت سندويشة، وبلشت أكل...

الذئب : بعدين قعدت تفكري وتفكري وتفكري... بكل  
اللي عملتية يومها... حتى نمتي.

ليلى : إيه نمت... بس ما بظن أنني نمت كثير... بس اللي بتذكره  
أني فقت وشفتك قاعد جنبي على نفس الكرسي...  
(تنظر للذئب) يعليك شو كنت وقح (تبتسم له).

ليلى : وكان قاعد عم يخلص أكل ستي، بكل نهم وجشع  
ولؤم.

(يجلس الذئب على الكنبه بجوارها... يضع يده خلف  
ظهرها بحركة تودد بينما هي تبتسم له)

ليلى : صرخت عليه... قلت له: (تخاطب الذئب): كيف بتتجرأ  
يا سيد... أنك تقعد على مقعدي... وبكل صلافة

ووقاحة، أنك تمد ايدك على كيسي... كيس الأكل  
تبع ستي وتاكل منه، وأنا نايمة... وقمت وطلعت من  
الجنينة.

الذئب : إليه صحيح... ووقت كنتي عم تقومي... قلتك بصراحة  
قديش جاكيك الأحمر القصير لابقلك..  
(ليلي تبتسم له) ايه بس أنا طلعت معصبة كثير...



ليلي : بعد يومين أو ثلاثة وكانت حالتي النفسية هي هي، ما  
تغيرت... قررت أنو اطلع لبره وروح أتمشى مرة تانية... كان  
الشتي ذاته... والغيوم مثل ما هيه واقفه بمكانها... وأنتوا  
بتعرفوا... الرمادي كلوا بيشبه بعضه، وأنا ملولة... كان  
بدي إلبس الجاكيك الأسود تبعي اللي اشتريته قبل يومين  
أو ثلاثة لأنو أنا ما برتاح بهيك حالات... يعني حالات الوحدة  
والعصبية الكبيرة، والإحساس بالفراغ... إلا بالتعويض...  
التجميل...أو التسوق... إذا بدكن.

مشان حس حالي جديدة... وما مرق عليي الزمن...  
ففتحت الخزانة (تتجه نحو الخزانة تفتحها تمسك  
المعطف الأسود)

الذئب : (بهدهوء) بس الجاكيك الأحمر بيلبقك أكثر أنا بحبه...  
ليلي : (تنظر إلى الجمهور) وأنا كنت معصبة كثير وقررت  
ألبس الجاكيك الأحمر

ووقت طلعت من البيت، عرفت أمي أني رايحة لأتمشى...  
فعطتني كيس الغدا وطبعاً طبعاً معه كثير نصايح...

وشوية لوم لحظها النحس معي، ولوجودي على قيد الحياة... ورحت أتمشى، اشتريت خاتم ماشي حاله لأيدي واخلخال حلو لرجلي، ولحالي... والله وكياكن لحالها رجليي أخذتني على نفس الجنية، ورحت قعدت على نفس الكرسي.

(الذئب يخرج بخاخ الماء ويرشها)

الذئب : يومها رشيتك بالمى بس من باب المداعبة.

ليلي : إيه حبيبي (يجلس بقريها).

(يدخلان بالدور)

ليلي : (بحزم) نعم شو بدك، شو بتريد... يا الله..

الذئب : ولا شي... عن جد ولا شي... بس شوي اشتقتك.

ليلي : اشتقتلي!... أنا بعرفك شي!؟ أنت بتعرفني شي!؟ لك

العمى منين جايب هالجرأة والوقاحة... (تتحي بوجهها وتهمس): بس بتعجبني.. !

الذئب : ولو... أنا اسمي دياب... أنتي ما بتعرفيني أبداً... بس أنا

بعرفك... منيح حتى أني جايبك هدية من يومين... بس أنتي ما أجيبي...!

ليلي : هدية... ليش؟

الذئب : مو لشي... هيك تفضلي... خاتم... على قياس إصبعك.

(تبدو ليلي مصدومة)

ليلي : (تخرج من الدور) بتعرف أني أخذت الخاتم بس لأنني

كنت مصعوقة للصدفة الفظيعة... وووو كيف قدرت تقرا أفكارى!؟

الذئب : وعجبك وقتها!؟

- ليلى : كثير... بس رجعتك ياه.. ! كنت خجلانة.
- الذئب : طيب متل ما بدك!  
(ليلى تطرق برأسها).
- الذئب : حاسس أنك ما عم تقدري تتحركي من كتر المشاكل اللي حاملتيها... واللي ما عم تعالجها وبس عم تهربي منها.
- لا تخاف في مني اعتبريني حدا بتعرفيه من زمان وخلينا نحكي... يمكن ترتاحي، وإذا ما ارتحتي فما في مشكلة... لأنك بتكوني حكيتي مع شخص يمكن ما تشوفيه مرة ثانية.
- ليلى : (تنظر إليه بتمعن) ليش بتضل حامل بخاخ مي دائماً معك...؟
- الذئب : أنا بشتغل بمحل الورد... هداك... تخيلي أنا بكل هالحجم وهالشكل، بشتغل بمحل ورد...  
(يرشها بالماء، فتضحك)
- الذئب : وبتعري في نحنا بمحل الورد ليش بنرش الورد بالمى...؟
- ليلى : ليش؟
- الذئب : مشان ينتعش ويزهزه ويرجع نضر وتفوح ريحته الحلوة (ليلى تبتسم للمجاملة وقد فهمت ما يقصد.. )  
(الذئب مخاطباً الجمهور): وخلينا عم نحكي مع بعضنا البعض شي ساعتين وبعدين حكينا كل شي عن حياتك..
- ليلى : بتعرف أنني حبيبتك هداك اليوم... حسيت حالي بعرفك... من زمان.

- الذئب : شو اللي عجبك فيني بالتحديد...؟
- ليلي : ما بعرف... أول شي أناقتك... وبعدين حكيتك... ثققتك بحالك... هدوءك، اتزانك... كنت عم تقرب مني وتشدني لعندك... وكأنك بتعرف أنني رح أنشدلك (تضع يديها على وجهها): كنت بتجنن.
- قبل ما أتعرف عليك ما كنت عرفانة أنني رح أنشد... لواحد متلك... كنت مفكرة أنه فتى أحلامي... غير شي تماماً... ناعم حلو... (ينظران إلى بعضهما البعض بحب ثم يتوجهان إلى الجمهور)
- ما كنت مفكرة أبداً أنه أنا أعجب بوجه متل وجهك... تقاطيع وجهك كتير قاسية... وتمك... هيك معبي.
- الذئب : كبير... مشان بوسك.
- ليلي : عيونك كبيرة... وحواجبك كثيفة..
- الذئب : واسعين مشان شوفك منيح وأتفحصك.
- ليلي : أما أنفك... صخري.
- الذئب : منحوت كبير... لشم ريحتك.
- ليلي : حتى راسك... ضخم وشعرك طويل.
- الذئب : غجري بري مشان تحضنيه بأيديك.
- ليلي : ومنلك هالجسم النحيل... متل الرمح.
- الذئب : من الطبيعة... ومن البراري... بعيد عن المدن والحارات والبيوت والقوانين، ولدت وكبرت بالغابة، لحالي بدون ما حدا يهتم فيني، متل الوحوش... اعتيت بحالي وربيت حالي، أبي وأمي ماتو واخواتي تركوني مع شوية مصاري... ودارت في الأيام.



حتى وصلتلك، وكنت عرفان أنورح أوصلك... يتيم  
 عشت ويتيم كبرت... (يقف ويشدها نحوه ويخاطبها)  
 وكل ما حدا يحطني بمدرسة، يخافوا مني الآنسات  
 والولاد... ولد صغير... طالعو سنان، وأنيابوا كثير  
 كبار... يخافوا ويضربوني، ومن مدرسة لمدرسة، صار  
 اسمي دياب، وفي عالم بيقولولي ديبو، وعالم ديب...  
 وعلى كتر الضرب وأنا زغير دجنوني، وصرت ديب  
 بيشتغل بمحل ورد.

ليلى : بس خالص بس! (تضمه إلى صدرها بحنان) (صمت ثم  
 تتابع) وبقينا نحكي ونحكي ونتمشى، مشينا يومها  
 لساعات تحت الغيم... السما ما شتت يومها، وشرينا  
 الشاي بالقهاوى، وقعدنا على الأرصفة... اشتريتلي ورد  
 أبيض بجنن... يا الله أسرتني يومها..

كل العالم بيقولوا خسى الديب... لأنهن ما بيعرفوا  
 الديب منيح... يمكن أنا عرفتوا... يا ترى حدا منكن  
 شي مرة راح لعند الديب وطلب منو طلب... أنا رحت...  
 ولباني...! حسيت بالحب وقلبي لأول مرة بحياتي دق...

الذئب : خليتي أضافيري تروح، بس بنفس الوقت حسيت حالي  
 جوعان... جوعان كثير...!

ليلى : يومها أنا تبدلت... انقلبت... حسيت حالي كبرت،  
 حسيت بأنوثتي... كان يوم تاريخي بحياتي... تبدلت  
 حياتي... نظرتي للأمور وللعالم اللي حواليني، صرت  
 حس العالم كلوا كلوا تبدل... العالم أحلى والناس  
 أطيب... غفرت لكل الناس، وسامحت كل اللي عامل

معي شي، مخي ما كان هون كان بمكان ثاني مع  
حبي الأولاني!

(تنظر إليه) تبدل بفضل حبك.. !

(من سقف المسرح ينزل فوقها آلاف الزهور الحمراء أثناء  
حديثها التي تغطيها بسعادة تامة وشعور بالفرح... بينما  
الذئب يراقبها بهدوء).



ليلى : ومرة من المرات بعثتني أمي... بمهمة خاصة... قالتلي

خدي هالكرزات لعند ستك... بتعرفيها كبيرة بالعمر  
وضرسها ماكن ونفسها خضرة وبتحب مربي الكرز  
كثير... بس أوعك يا أمي تاكلي منهن هدول مستويين  
كثير وما بدني ياكي تدبغي تيابك بدمهن.

لا تطلعي بالباص، خدي مصاري وروحي بالتاكسي...  
أسرع... أنت كبرت وصار بينخاف عليك، بعدين ما  
بدي العالم يدفشوكي أو شي حدا غليظ يوقعلك  
الكرزات وتلوتي تيابك.

والله قتلها حاضر... وبتعرفوا كلام الأمهات دائماً لازم  
ينكسر... والأم حكيمة لأنها من أهل أول، والبنت  
شقية لأنها من أهل آخر! وعم تكتشف.

المهم حملت الكرزات ومريت لعند دياب على محل الورد  
شوفه...

الذئب : طلعلنا وتمشينا... نزلنا على وسط البلد اشترينا لبعض

خواتم نحاس من على البسطة... مشينا ومشينا... فطنا

عالسينما لنشوف فيلم لعبد الحليم حافظ وكلمة مني  
وكرزة منها وكرزة مني وكلمة منها... خلاصنا  
الكرزات كلهن ولوتنا أواعينا واندبغت شفافنا...  
وأصابيعنا بدم الكرز اللي ما عاد يروح وصار لون  
شفايفك أحمر مثل النسوان وقت يحطوا حمرة  
ومكياج... وما كان يخلص الحكي... طلغنا عالشارع .  
كلمة مني وكرزة منها وكرزة مني وكلمة منها...

(يفتحان علب مربى الكرز ويبدأن بتناوله باليد ، ورويداً  
رويداً تزداد طريقة أكل المربى لتصبح أكثر  
لعبية، فيبدأن برشق بعضهما البعض بالمربى، وتزداد  
ضحكاتهما ويزداد اللعب في مشهد إيقاعي ولعبي  
جذاب بصرياً ، حتى يلوثان ثيابهما بالكامل باللون  
الأحمر ومع انتهاء اللعب بالمربى يكتشفان أن لونهما  
قد أصبح أحمرأً بالكامل)

ليلى : وصلنا لعند ستي... ما معناشي... تعبانين من المشي...  
بطنك عم يوجعك من كتر الكرز... وكنزتك مدبغة  
بالنبيدي الغامق. وأنا سناني صار لونهن أحمر مثل الدم  
(يضحكان)

ليلى : يومها كثير حبيبتك كان حديثك حلو... وكثير  
رومنسي... فعلاً الحجر اللي ما بعجبك بيّفجك.

الذئب : فعلاً أهل أول ما تركوا شي ما قالوه (يضحك).

ليلى : وأمي أهل أول... وأنا ما سمعت شو قالتي... وما عاد  
عرفت شو بدّي أعمل..

(تخاطب الجمهور) لوتت حالي بدم الكرز... شو بيدي  
قول هلق لستي... ل التيتة...

الذئب : يومها بكيتي كثير... كنت خايفة وعيظتي عليي،  
كأني أنا بس اللي أكلت الكرز وهرينا.

ليلى : كنت خايفة منك... خفت أنك تتركني... أو أنك ترمي  
الخاتم اللي عطيتك ياه أو أني وقع الخاتم اللي عطيتني  
ياه وضيعوا... تذكرت قصة التواليت والخاتم... وصرت  
أحلم وأنا فايقة، شفت خاتمك مرمي بالمى النضيصة وأنا  
ما عم بقدر جيبو.

الذئب : قديش أنت ساذجة !.  
(تنتقل ليلى إلى الطرف الآخر من المسرح بينما  
يراقبها).

ليلى : رجعت عالييت بهداك اليوم... وكانت أمي عم تغلي  
المعود ومشغولة... أما أبي فكان عم يتسلى وينضف  
بارودته تبع الجيش القديمة... أخذت أمي على جنب  
وقلتها كل شي، قلت لها أني بحبك وأني بعد اليوم  
مالي قدرانة عيش بدونك فقالت لي: وهو بيحبك؟ بدو  
يتجوزك؟ شو بيشغل؟

ليلى : ما قدرت وقتها جاوبها بشي... كنت فعلاً مالي قدرانة  
حدد مشاعرك تجاهي... وما جاوبتها بشي... قام حسنت  
عليي...!

(في المقاطع القادمة، على لسان شخصية الجدة تتحدث  
الشخصيات المستحضرة بطريقة الخطأ في ضمائر  
المذكر والمؤنث أي مثل اللغة التركية التي كانت

متداولة منذ زمن لدى المسنين ، وذلك لخلق أسلحة  
مسرحية في البنية الحكائية في السرد)

صارت أمي تبكي... وقالتلي: أنت غلطت... أنا بعرف من  
شكلك من صوتك من حركاتك..

ضربتني كف، وقعدت تندب حظها... وتقول البنات  
بتجي وبتجيب بلاويها معاها..

ايه... الله يلعن البنات ويلعن خلفتهن..

ويدت تهددني... شي أنو بدها تحبسني، وشي أنها بدها  
تقول لجدي يحاسبني... لأنو أبي ممكن يرتكب جريمة  
فيني... وصارت تحكي معي مثل ما أمها بتحكي  
معاها... (الأم مقلدة الجدة): أنت حوماره كيف بتسمعي  
كلامها... كلامها كلو كذب بدها تلف وتدور لحد  
ما تاكل عسلاتك... بعدين اسمو دياب في حدا بالعالم  
بيسمي ابنه دياب....

وحبستني أمي بالبيت، لا طلعة ولا فوتة، ولا حتى على  
جينة البيت... التلفون ممنوع والتلفزيون محرومة منه...  
صارت حياتي جحيم... فقررت أحبس حالي بالغرفة.. لآ  
أكل ولا شرب... قعدت بالتخت شهر، وشوي شوي غبت  
عن الوعي وكنت رح موت من الجوع... دبلت مثل الوردة  
اللي بدون مي... وأمي وأبي جنو وصارت أمي تبكي طول  
الليل وتقلي الله يلعنه شو عمل فيكي؟ شو سحرك؟  
وكنت أنا عم فكر فيك (تتظر إليه وتبتسم).

زارونا الجيران وقالتلن أمي شو صاير معي... فقالولها...  
هي أكيد راكبها جني أو متلبسها شي عفريت!! مدري

شو الله يستر... وقامت الدنيا وقعدت... وصارت  
أمي تقللي... مستعدة اعمل أي شي بس كلي شي ... أي  
شي..

قتلتها وأنا دايدة: بدي روح لعند ستي...  
وهادا اللي صار... أومي وأبي أخذوني لأقضي فترة نقاهة  
ببيت ستي... بركي برتاح وبغير جو... ويكون تحت  
اشراف ستي من جهة تانية .

الذئب

: هديك كانت فترة كثير رائعة...

ليلي : طبعاً يا خبيث... ستي كبيرة روح قلبها النوم... وانت  
استغليت هالشي وصرت تنط كل يوم لعندنا.

الذئب

: كنت روح كل يوم لبيت ستك... (ينتقلان إلى القسم  
الآخر من الخشبة) ونقعد وناكل ونشرب... نضحك...  
نفتح براد ستك ونبلش ناكلها أكلاتها...  
على فكرة ستك بتطبخ أكل بيجنن وأكثر شي معلمة  
فيه هو المري... وأنت بتعريفني أنا روح قلبي الحلو...  
خصوصي مع الزيدة والسكر.

ومن ورا أكلاتها لستك صرت حبا... لأنه كان عندها  
كنز من المري... بغرفة المونة كانت مخزنة رفوف من  
المريبات... وقتها قتليلي: الك عندي مفاجأة وأخذتيني  
عالقبو تبع ستك... وهنيك فتحنا قطرميزات المري وصرتي  
تطعميني بايدك لحد ما دخت... وفجأة سمعت صوت  
حركة فوق... كانت ستك... سمعانة صوت وجاية لتشوف..

ليلي : قلتك خود لبيس عبايتي مشان تتخبي فيها... وفجأة  
انفتح الباب

- وظلعت ستي: قالت: مين هون... شو فيه شو عم يصير...
- شو يا ليلي؟ شو عم تعملي هون؟
- الذئب : كيف حالك يا ستي ..؟
- الجدة : منيح... الحمدلله... !
- (ليلي تبتم)
- الجدة : (تنظر اليه بتمعن) وليش هيك شكلك بيخوف  
يا بنت؟
- الذئب : ما بيخوف بس الدنيا عتمة.. !
- الجدة : وليش تمك كبير..؟
- الذئب : مشان بوسك منيح يا تيته.. !
- الجدة : وليش ايديكي كبار كثير؟
- الذئب : مشان شيلك بقوة واحضنك يا تيته.. !
- الجدة : وليش عيونك كبار كثير؟
- الذئب : بيتسم... مشان شوفك منيح واتملاك يا تيته..
- ليلي : وشعلت ستي الضو وشافت هديك الشوفة، شافتك لابس  
العباية تبعي وانا واقفة بالزاوية عم اضحك...
- الجدة : أنت شو عم تساوي هون... أنت مين فوتك لهون...  
(يستغرب الذئب) وأنا عم قول لحالي مين عم يسرقلي  
صواني المري اللي بعملهن... وياكلهن
- الذئب : (بصوت خفيض) ليش انت قدرانه تعملي شي؟
- الجدة : (تبدأ بالصراخ) يا سراق يا حرامي... يا عالم يا ناس...  
امسكوه.
- الذئب : (بغضب شديد) ايه طولي بالك... أي شو أكلتك الك..؟

- الجدة : يا حرامي... أنا بعمل المربي مشان الشتى وأنت جاية عم  
 تاكلهن هلق... عم تسرقهن... امسكوه... حرامي!
- ليلى : (تخرج من جدتها) يا ستي... ايه شو عمل يعني... طولي  
 بالك..
- الجدة : لأ ما بدي طول بالي هيدي مو حرامي هيدي ديب.. !  
 هيدي مو انسان هيدي حيوان شوف سنانو كيف  
 لونهن.. !
- الذئب : (يغضب بشدة بينما ليلى تخاطب الجمهور) وكأنو سنانو  
 هيك من كتر أكل الكرز... دبغوا (تعود للمشكلة).
- الذئب : ذكررتني بأيام المدرسة والتشرد ودقت في الحيونة عن  
 جد فقلت لها: طيب موهيك عم تقولي، أنا بحبها وبحبها  
 وبحبها وهي متل مرتي (يذهب نحو عبوات مربي الكرز  
 فوق الرف ويفتحها ويبدأ بالتهامها أمام الجدة ويحتضن  
 ليلى ويقبلها ويطعمها المربي بيده): دوقي حبيبي دوقي،  
 طيب مو؟
- (ليلى تبدو محرجة جداً أمام الجدة لكنها لا تستطيع  
 المقاومة أبداً)
- الجدة : (تتهار من الغضب بشدة وتبدأ بالصراخ) الله لا يوفقك يا  
 حمارة يا حيوان أنت أكيد جنيت شو عم تعملي أنتي.
- ليلى : أنا
- الجدة : لأ أنتي... ذئبة... ذئبة!
- (ومع ارتفاع أصوات الشجار يدخل رجل ضخماً جداً هو  
 والد ليلى فيسود الصمت ما عدا صوت بكاء الجدة  
 بينما تبتعد ليلى عن الذئب)



ليلى : (إلى الجمهور) هادا بابا... مثل ما قلتلكن كان يحب  
ينضف بارودتو دائماً لأنو ما بيعرف اي متي بستخدمها...  
(الوالد ينحني للجمهور ثم يعود): مين أنت ولاك... وشو  
عم تعمل هون؟

وأنت وليه ليلى أنا بفرجيكي تركتك بيتك ستك مشان  
تتربي طلعت عم تشوي في حيوانات من وراي... انقلعي  
علييت... وحسابي معك بعدين... (تركض ليلى وتختبئ  
خلف الباب بخوف).

الوالد : مين أنت يا أخ بقدر أفهم (يلقم البندقية)؟

الجدة : هي حيوان... حيوان متوحشة ، انتبه منو أخذتلك بنتك  
وكان بدا تبلعلك ياه... مو بس هي وأنا كمان... (تنهار  
بالبكاء) وأكللي كل الكرز تبعي وتبع بنتك...  
حيوان

(ومع كلام الجددة يزداد غضب الأب بشدة يحمل  
البندقية ويتقدم نحوه)

الوالد : وأنا اللي رح أعملوا أني رح بزقك الدم وخليك ترجع  
كلشي أكلته أو أني شقلك بطنك وطلع كل شي  
جواه...

(يختفي الرجل والذئب في الداخل وتختفي الجددة من  
الجانب الأخر)

تتقدم ليلى إلى الأمام إلى مقدمة الخشبية..

ليلى : وهيك كشفنا البابا... وعرف كل شي بيناتنا..

قام فعلاً بزقوا الدم لحبيبي وخلا يندم على الساعة اللي  
تجرأ فيها ولمس شي مو ملكه مثل ما قال.

بس أنا بحبو، دارت فينا الأيام ودارت ورجعت روح من الطريق الطويل لأنو في مناظر أحلى وبيخلي الواحد يتعلم أكثر، حبيت طريق الباص لأنو ما بحب التكسي ما بعرف ليش... وشفت كتير عالم ورجعت شفت حبيبي مرة تانية بالصدفة ورجعنا لبعض...

(يظهر الذئب مجدداً وهو يحمل بخاخ ماء محل الزهور)

(يتعانقان)

ورجع البابا كشفنا... ورجع بزقه الدم... ورجعنا لبعض بالسر..

أهلي مو رضيانين فيه... لأنه حيوان مثل ما بيقلوا وأنا أكثر شي حبيته فيه هوه حيونتو...

الذئب : ( بنزق) أي يالله امشي...!

ومرت الأيام وأنا قاعدة بالبيت عم بستنى حبيبي (يرقص الاثنان على نغم موسيقى فالس سعيد ثم يحملها ويتقدم بها الى مقدمة الخشبة)

ليلي : بدي قلكن شغلة، بعد تجربة صعبة، الذئب ما بيحب

الغنم، مثل ما بيقلوا، صحيح ممكن ياكلن، بس ما بكون مستمتع، الذئب طول عمروا بيحب ليلي... وليلى ممكن تحبه... ومشان هيك صاروا ليلي والذئب...

فلا تكونوا غنم أبداً... هربوا وبعدوا قد ما فيكن عن الراعي وزميرته، لأنو هوه اللي بيدعي أنو عم يحميكن آخر شي كمان بياكلكن... متلوا مثل الذئب... وهي الخيار بأيديكن.

آه بعد كل هالشي ما بتذكر... غير صوت أمي عم  
بتقلي: خدي التاكسي... هه!  
لا تفوتي بالغبابة لأنو الغابة... طريقها معتم... أسود... وما  
حدا بيعرف وين بيودي... وكثير ممكن ياكلك الديب.  
(يتقدم الذئب نحو الأمام، يتأبط ذراعها... يتركها  
للحظات... يتقدم نحو الجمهور... يأخذ بخاخ الماء...  
يرشق الجمهور ثلاث رشقات)

الذئب : آسف لا تترعجوا... بتنعش شوي... ما هيك..؟

بس أنا آسف كمان مرة...!  
الناس بتقول... المي فراق... وأنتوا بتعرفوا... أهل أول ما  
تركوا شي وما قالوه... ايه... وهي أنا عم بخكن..  
(في هذه الأثناء نسمع موالاً للرحابنة بصوت جبلي وقاس):  
(عيني ما تدوق النوم يا ديب... حاكمها قلق ونعاس يا ديب  
غدي تسرح مع التتيان يا ديب... . وتفعّل ما تريد  
وتشتهيّه)

(يعود إلى ليلي يتأبط ذراعها ويخرجان)

إعتام

تمّت

♦ قدم هذا العرض في دمشق، إخراج باسم عيسى، سنة 2008.

## صدر للكاتب

- الريح والملح مجموعة قصصية دار كنعان - دمشق (2003)
- تفسير الأحلام مجموعة قصصية دار ممدوح عدوان (2007)
- ربح مسرحية سلسلة ذاكرة المسرح السورية (2008)

## سلسلة ذاكرة المسرح السوري

ناكر الجميل	أبو خليل القباني	1
وا معتصماه	عبد الوهاب أبو السعود	2
طريق النصر	وصفي المالح	3
هاروت وماروت	خليل هنداوي	4
صابر أفندي	حكمت محسن	5
شيطان في بيت	مراد السباعي	6
قارعو الأبواب	حسيب كيالي	7
القضية والحل	سلمان قطاية	8
العصفور الأحذب	محمد الماغوط	9
وبعدين؟..	وليد مدفعي	10
إيفا	وليد فاضل	11
سهرة ديمقراطية على الخشبة	وليد إخلاصي	12
طقوس الإشارات والتحويلات	سعد الله ونوس	13
الممثلون يتراشقون الحجارة	فرحان بلبل	14
رضا قيصر	علي عقلة عرسان	15
الدرأويش يبحثون عن الحقيقة	مصطفى الحلاج	16

العرس الحلبي	عبد الفتاح قلعجي	17
لعبة الحب والثورة	رياض عصمت	18
ليل العبيد	ممدوح عدوان	19
حلم ليلة عيد - صدى	حكيم مرزوقي - عبد المنعم	20
	عمائري	
مجنون يحكي وعاقل يسمع - الرجل	زيناتي قدسية - موفق مسعود	21
الدائري		
المدينة المصلوبة	الأب إلياس زحلاوي	22
الخطا التي تتحدر	أحمد يوسف داوود	23
تلك الليلة	شوقي بغدادي	24
	الكتاب الشباب ج1	25
خيل تايهة	- عدنان العودة	
ليلة	- عمر أبو سعدة	
آخر العشاق	- محمد أبو لبن	
باريس في الظل	- يم مشهدي	
ريح	- الفارس الذهبي	
	الكتاب الشباب ج2	26
بروانة أو الحرائق	- هوزان عكو	
حكاية بلاد ما فيها موت	- كفاح الخوص	
الفيروس	- وائل قدور	
الملحق	- ليندا الأحمد	
قدم إلى الأمام قدم إلى الوراء	- يامن محمد	

## إصدارات دار ممدوح عدوان

- الأعمال المسرحية الكاملة. تأليف: ممدوح عدوان. ط1 (2006)
- هواجس الشعر/ دراسة نقدية. تأليف: ممدوح عدوان. ط1 (2006)
- أعدائي/ رواية. تأليف: ممدوح عدوان. ط3 (2007)
- الجنوبي/ سيرة الشاعر أمل دنقل. تأليف: عبلة الرويني. ط2 (2006)
- تفسير الأحلام/ قصص قصيرة. تأليف: الفارس الذهبي. ط1 (2007)
- جنون آخر/ مقالات. تأليف: ممدوح عدوان. ط1 (2007)
- النقد الذاتي بعد الهزيمة/ دراسة. تأليف: صادق جلال العظم. ط3 (2007)
- تقرير إلى غريكو/ سيرة ذاتية. تأليف: نيكوس كازنتزاكيس. ترجمة: ممدوح عدوان. ط2 (2007)
- زوريا البرازيلي/ رواية. تأليف: جورج أمادو. ترجمة: ممدوح عدوان. ط2 (2007)
- تهويد المعرفة/ دراسة. تأليف: ممدوح عدوان. ط2 (2007)
- حيونة الانسان. تأليف: ممدوح عدوان. ط2 (2007)
- مختارات شعرية. تأليف: أمجد ناصر. ط1 (2007)
- تاريخ التعذيب/ دراسة. تأليف: بيرنهاردت ج. هروود. ترجمة: ممدوح عدوان. ط2 (2008)

- أطياف ممدوح عدوان: شهادة الحياة وشهادة الإبداع (حوارات منتخبة)/ دراسة. تأليف: أ د محمد صابر عبيد. ط1 (2008)
- حكاية الشيخ أبي خليل القباني والوالي مدحت باشا العثماني. / مسرحية. تأليف: دلح الرجبي. ط1 (2008)



قرأت المسرحية عدة مرات فإزداد إعجابي بها  
جداً وساعدني المؤلف الذهبي كثيراً بإشاراته  
وتوجيهاته ، فجعلني أحول في مخيلتي النص  
إلى عرض ، أعتزف بأنني استمتعت به كثيراً .  
ولا شك أن المؤلف أدرك بحسه المرهف الرائع  
وقراءته الدقيقة للموضوع أن علاقتي بمولانا  
ستساعدني على فك شيفرة توجيهاته وإشاراته  
وأرجو أن أكون نجحت بل و أرجو للمخرج  
و الممثلين وصانعي الديكور والموسيقى أن يجيدوا  
قراءة هذا النص الذي لا أتردد الآن في القول  
أنه مذهل .

د . نصر حامد أبو زيد



المسرح والكتابة والنشر والتوزيع